




Zur
Gräfl. vom Hagen'schen

Majorats - Bibliothek



MÖCKERN

gehörig.

No 1415

21
W/



5

VSV PRACTICO
ACTIONVM
BONAE FIDEI
ET
STRICTI IVRIS
DISPVTABIT
PRAESIDE
NICOLAO HIERONYMO GVND-
LINGIO ICT.

SERENISSIMO AC POTENTISSIMO BORVSSIAE

REGI A CONSILII INTIMIS ET ECCLESIASTICIS IV-
RIVM PROFESSORE ORDINARIO h.t.

DECANO

III NONAS OCTOBRIIS CIC 17CC XXIV.


H. L. Q. C.

PRO PRIVILEGIIS DOCTORIS
CONSEQVENDIS
PHILIPPVS DANIEL ANDREAE
HERBORNA - NASSOVIVS.

HALÆ MAGDEBVRG.

TYPIS CHRISTIANI HENCKELII, ACAD. TYPOGR.





CONSPECTVS DISSERTATIONIS.

CAP. I.

Theoria actionum bonæ fidei & stricti iuris.

§. I.

Ab omni contractu abesse mala fides debet, quæ opponitur dolo. §. II. Hic bona fides non solum excludit dolum, sed in primis strictum, durum, directum: ita ut, quid sit præstandum vni ab altero, rite expendat iudex §. III. Minus Prætoris ac iudicis. §. IV. Index factum circumspiciebat. §. V. Interdum libere; sedque explicatur, §. VI. Interdum ad stricte; quod si idem exponitur, §. VII. Formula: fide bona. §. VIII. §. IX. Cur stricti iuris actiones non appellantur mala fidei? §. X. Iudex quare arbiter? §. XI. Non omnes actiones ex æquo & bono venientes sunt bona fidei. §. XII. Ut quædam illarum habent hanc qualitatem. §. XIII. §. XIV. Nec interpretatio ex bono & æquo arguit illico actionem bona fidei. Quod exemplis illustratur. §. XV. Aequitas opponitur verbis & litteris, item iuri. §. XVI. An Prætor semper inserere formulæ debuerit: bona fide? §. XVII. Arbitrariae actiones non sunt bona fidei, §. XVIII. §. XIX. §. XX. §. XXI. Quod luculentius & per exempla docetur, §. XXII. Caussa, quare Romani aliquas actiones in classem bona fidei, aliquas in stricti iuris competenterint, difficile indagatu. §. XXIII. Plebs nouas cupiebat leges, metuebatque sibi a Patriciis. §. XXIV. Qui formulas actionum excogitabant: quæ tamen minime efficiebant, ut vel contractus, vel actio fieret stricti iuris: quod latius ostenditur

):



CONSPECTVS DISSERTATIONIS.

ditur. *Habebant enim & bonæ fidei negotia suas formulas. Verum discrimin inter hæc dua iudicia.* §. XXV. *An omnes contractus primi iuris stricti?* §. XXVI. *Inhærebat plebs cum multis oratoribus tñ pñtñ: aliqui æquitatem commendabant: donec temperamentum inualesceret, ut quidam contractus bonæ fidei existimarentur, aliqui stricti iuris manerent.* §. XXVII. *Argumenta pro stricti iuris contractibus.* §. XXVIII. *De mutuo nonnulla.* §. XXIX. *Argumen- ta pro contractibus bonæ fidei, atque inde manantibus actionibus.* §. XXX. *Formula in actionibus strictis.* §. XXXI. *An dolo Romani sunt patrocinati?* §. XXXII. *Qui ab hac labe defenduntur: ut populus pedetentim declinavit a bona fide.* §. XXXIII. *Hinc prætores contraiuere fraudibus. Aquilius actionem doli inuenit; Cassius exceptionem.* §. XXXIV. *Qua in bonæ fidei negotiis opus haud erat. Formula in bonæ fidei actionibus.* §. XXXV. *Neutquam tamen nomen contractum & actionum bonæ fidei ab illa formula fluxit. Sed alia potius causa magis verisimilis e Tullio assertur: cuius locus ex lib. III. de officiis adductus exponitur clare & accurate,* §. XXXVI. *Quid iudicium sine lege?* §. XXXVII. *Fecit philosophia Stoicorum, ut latius propagaretur in contractibus bona fides. An omnia iudicia bonæ fidei potuerint effici?* Respondetur distincte. §. XXXVIII. *Nulla actio bonæ fidei dicenda, vel stricti iuris, nisi que proficiat e contractu.* §. XXXIX. *Numerus actionum bonæ fidei a Iustiniano indicatus an accuratus?* §. XL. *Imperatoris mens declaratur. Cur actio finium regundorum non fuerit habita bona fidei?* §. XLI. *Difficultas circa hereditatis petitionem: Iustiniani decisio examinatur.* §. XLII. §. XLIII. *Eiusdem factum perpenditur, dum actionem rei uxoriæ in illam, que est ex stipulatu*



CONSPECTVS DISSERTATIONIS.

pulatu transfudit. §. XLIV. Error ICTORUM quorundam, numerum actionum bonæ fidei incertum mansisse existimantum. Quare non omnes contractus innominati sint bonæ fidei? §. XLV. Romani primario ad societatem & mutuas præstationes communi voto consilioque intentas respexere. §. XLVI. In obligationibus certis non permisere iudici liberatem arbitrandi: sed præponebant incertas, ubi arbitrium foret necessarium. §. XLVII. An non contractus quidam innominati videantur potius unilateralis? §. XLVIII. Quam ob rem aestimatorius contractus bonæ fidei? §. XLIX. Effectus actionum bonæ fidei & stricti iuris deducuntur ex dictis. §. XL. Ac causa redditus quare (1) in strictis ultra petitione non processerit index, §. LI. (2) iurandum in litem non admissum? §. LII. (3) exceptiones bonæ fidei iudicis inhiberint, non autem strictis? §. LIII. (4) illæ omni litis tempore opponi potuerint? §. LIV. (5) ob moram usuræ incepient que? §. LV. (6) actio tolleretur ipso iure? Cuius phraseos sensus explicatur dilucide. §. LVI. Quædam de compensatione ex veteri jurisprudentia & Iustiniana. §. LVII. Quæstio expenditur, an adiecta stipulatione contractus bonæ fidei fuerint transfusi in contractus stricti iuris, itemque litterales redacti in scripturam? §. LVIII. Hinc clare docetur, quare emptionibus venditionibus ceterisque bonæ fidei contractibus apposta stipulatio? Qui inde resultauerint effectus? §. LIX. Emptio in scripturam traducta tam laxa & benigniter explicatur, ac se deessent litteræ. Vulteius laudatur. §. LX. Aliud, si nouandi animo stipulatione usi sunt contrahentes: qui non presumitur, sed probatur. L. 71. ff. pro socio consideratur. Immo saepè ob certum caput additur stipulatio; ac nihil accidit mutationis, sed vinculum adiicitur

)

vincu-



CONSPECTVS DISSERTATIONIS.

vinculo. Laudatur Dominicus Aulisius, qui difficiles hosce nodos feliciter expediuit. §. LXI. Cuiacii opinio confutatur, ob clausulam dolum malum abfuturum stipulationes quoque, omnesque stricti iuris contractus fidei autumantis. Fundamentum erroris detegitur. §. LXII. Lex Seia 42. ff. mort. causs. donationibus in luce constituitur.

CAP. II.

Vlus practicus actionum bonæ fidei & stricti iuris nullus.

§. I. Non est necesse, ut quia formula desiere solennes, deſſiſſe etiam censeatur differentia actionum bonæ fidei & stricti iuris. §. II. Nec opus, ut ad ius canonicum prouoceatur: de quo dubium, an sustulerit ſaþe diſcriben. §. III. §. IV. Error doctorum differentiam hanc ex iure naturali necessario deducentium. §. V. Potius commen-tum hic inuenitur Quiritium. Quod copiose probantr. §. VI. Noua ratio, quare mutuam stricti iuris voluerint Romani; itemque gratuitum. §. VII. Quod non est secun-dum ius rationis. §. VIII. quemadmodum diuisiones con-tractuum Romanæ nequaquam ex iure gentium; sed inde potiſſimum ortæ sunt, quod pacta nuda non obligarent. §. IX. Laudantur Grotius, Puffendorffius, Thomasius. §. X. Teu-tones rationis præscriptionem hac parte sequuntur. Nec Principes agnoscunt ratione suorum contractuum illam dif-ferentiam bonæ fidei & stricti iuris. §. XI. Magistratus no-bri de iure & facto cognoscunt: nesciunt Iudices pedaneos. §. XII.



CONSPECTVS DISSERTATIONIS.

§. XII. Iustinianus, ut euaniere iudices pedanei, illud discrimen in iuris arte radicatum non sustulit: Germani vero numquam aliquid de illo audierunt, nec istud intellexerunt. Quod luculentius expenditur ac demonstratur. §. XIII. Germani naturam ac mores suos non deposuerent uno momento. Ius Romanum non potuit uniuersim cum rebus nostris coniungi, aut instituta nostra immutare. §. XIV. Ineptum est, dicere, actiones bona fidei & stricti iuris in usu versari, quas paucissimi IC- torum intelligunt, deque quibus grauissime altercantur. §. XV. Inconcinne loqui, qui hanc differentiam statuum per constitutio-nes Imperii abrogatum, que nunquam fuit ac multo minus obtinuit; nudumque latus aduersariis leguleios præbere. §. XVI. Adeoque cauſam bonam male defendere. Vera cauſa, ear in mutuo ob moram permisse uſura? Rabularum impuden- tia repressa in recessu deputationis a. 1600. atque æquitas ex more veteri reducta. §. XVII. Vnde in illa constitutione non inuenitur exceptio a regula. §. XVIII. Neque a nobis ea propter lex imperii extenditur: quia plane ignotum Germanis fuit hocce Romanorum inuentum. §. XIX. Eiam Galli & Belge istud non obseruant. In nulla lege Germanica aliquid de isto discri- mine occurrit. §. XX. Ineptæ doctorum deteguntur, qui ius Quirinum pro uniuersali iure venditanti, & instituto Germano- rum pro speciali. §. XXI. Nunquam istud receptum est absolute: mansere Teutonici mores. Ius civile commune dictum antequam nostri de eo cogitarunt. Ius Germanorum scriptum appellabatur: consuetudo: & quare? §. XXII. Hinc minus apposite, que de consuetudine tanquam iure non scriptio afferun- tur, huic questioni accommodantur. §. XXIII. Mutuum varia bodie pacta recipit, unde actio nascitur. §. XXIV. Apud nos ex- pio dolii obicitur in strictis iudiciis omni tempore etiam in ipss executionis finibus: quod exemplo declaratur. §. XXV. Nec minus in illis iuratur in item. Refelluntur dissentientes. §. XXVI. Officium nostrorum iudicium nobile est semper. Ostenditur



CONSPECTVS DISSERTATIONIS.

ditur, quam non intelligent Practici naturam actionum bonæ fidei & stricti iuris. Goswinus ab Eshach infulse Carpzouio obloquitur; & ad decreta doctorum dissentientium prouocat; atque ex iis praxin vniuersalem in Germania impugnat. §. XXVII. Reuicitur hæc methodus, simulatque euincitur, ea- dem ratione defendi posse, apud Germanos, nullam vim obligandi pacis nudis inesse. §. XXVIII. In ius Romanum sit i- psa ratio? Vincentius Grauina notatur. Iosias Simlerus laudatur. Vox Chindasnindi Gorborum Regis. §. XXIX. §. XXX. Opinio vana Doctorum existimantium, ius patrium non obtinere, quia aliter pronuntiarent ipsimet. Frustra in condicione indebiti Leguleii usuras negant ob moram. §. XXXI. Frustra, in donationibus & contractu facio ut des: præsertim, cum ea negotia in foris nostris considerentur vi pa- eta. Pacta sua Germani nunquam in bonæ fidei & stricti iuris diuiserunt; ignorant etiam illi pacta legiima. §. XXXII. Pudendum sphalma, actionem quod metu caussa pertinuisse ad actiones bonæ fidei. §. XXXIII. §. XXXIV. ac multo maius, contractus ex metu initos adhuc consistere, & rescin- dendas, non autem ipsos iure nullos esse. Rationes ita so- mniantium lictorum dispellantur. §. XXXV. Caussa Ro- manæ iurisprudentiæ hac parte. §. XXXVI. Qui eam Ger- manis commendant, næuum illis obrividunt: illustris Thoma- sius dependit; eiusque doctrina de obligatione ex metu iu- re nullo vindicatur. Qua ratione sit intelligenda enunciatio: Pacta per se non producunt obligationem in regno rationis. §. XXXVII. Teutones non indigent actione doti subsidiaria, aut prætoria. §. XXXVIII. Cambium non est contra- dus stricti iuris sensu Romano. §. XXXIX. Conclusio.





DE
VSU PRACTICO
ACTIONVM BONAE FIDEI
ET
STRICTI IURIS

PROOEMIVM.



Vi de usu pratico actionum bonae fidei & stricti iuris differere cupit, is οτιωγηικως primum comprehendat oportet, quid fuerit actio bonae fidei, quid itidem stricti iuris, ne Andabatarum more pugnetur, multaque milceantur, qua non pertinent ad rhombum, sed suis seorū collocanda sunt

A

sunt

sunt locis. Quod ut obtineamus , faciendum est pro virili ; sed ita tamen, ne in tractatum excrescant, quæ sumus meditati.

CAPVT I.

THEORIA ACTIONVM BO-
NAE FIDEI ET STRICTI
IVRIS.

§. I.

ET verum est , omnibus in actionibus requiri bonam fidem; vnde inferendum potius, totam differentiam actionum bonæ fidei & stricti iuris videri commentitiam. Saltem ita rescripsere Imperatores Diocletianus & Maximinianus l. 4. C. de V. O. BONAM FIDEM in contractibus considerari aequum est. At de eo non est quæstio. In adducta enim lege bona fides opponitur dolo, & fraudi; estque exploratum, ab omni conuentione & contractu dolum abesse debere. Ex quo confit, FIDEM BONAM hoc loco aliud sonare, hoc est, nec fraudi opponi, nec astutiæ.

§. II.

Potius *bonafides*, excludit strictum, durum , directum, asperum, simplex, quod nunquam quidquam cedit, nec alteri plus concedit , quam est nuncupatum verbis, expressum litteris, aut ex facto præstitum præstandumque rursus. Vnde altius repetenda res.

§. III.



§. III.

Prætor apud Romanos cauſas ipſem non iudicabat, ſed iudices penteſibus dabat, ſimulque aetio-nes largiebatur & exceptiones: quod ſignificat ſane, eum respondiffe de iure, nempe, an qui petebat, age-re poſſit, quomodo, quo tempore? item, an reo ſit per-mittenda exceptio, quam aduerſus aetorem poſtulabat? De hoc in iure, id eſt, apud Prætorem & pro iphiſus tri-bunali diſceptabant partes praefentes. Quæ res tecit, vt ius iudiciumque deſcribantur tanquam diuersa: quo-niam in poſtremo de facto ſolum diſputabatur, quod vi-nus negabat, alter adfirmabat; de iure vero nulla am-plius erat ſignata contentio. Poſlet hoc explicari e multiſ Ciceronianis lociſ, niſi otium hac parte nobis feciſſent iuriſconsulti humaniores fere omnes, Brifſo-nius, Hottomannus, inque primis Iofephus Auerani
Interpret. Iur. lib. I. cap. XIV. n. 29.

§. IV.

Factum circumſpicitur vel liberius, vel adſtriectius: Habet enim vnumquodque negotium ſuam naturam vel ex lege, vel definitione partium expreſſa.

§. V.

Qui libere iudicat, integra gera & aetitata, ſimul-atque æqnitatem ante oculos habet conſtitutam, non meram legem, non verba directa & simplicia: eoque laxat habenas ingenio in æquitatem prono, ſententiamque fert, non prout lex fuadet, aut iuſtitia, vt in ver-bis litterisque conſiſtens obligatio, ſed prout cum hu-manitas impellit, variamque περιστάσεων conſideratio in regno rationis liberrimo poſitum inclinat. Igitur

A 2

bona



bona fide iudicat, id est, plene, exacte, accurate nullis inclusis cancellis a prætore, exceptionesque REI ex ipsa actionis natura atque contractus elicit, & fulcit; sicuti & ACTOR auxilio venit, non ex formula sola, sed ex natura negotii & actis, quoad æquius & melius.

§. VI.

Quod ut in nullo negotio intelligitur; ita vicissim stricte iudicat, qui fines verborum simplicium egredi non audet, ac ne latum quidem vnguem a vocum sonorecedit, aspera licet omnia sint, seque dolus immisceat, aut metus interueniat, aut pacta adiecta obseruentur: nisi quidem Praetor tanquam ex machina adueniat, & imploratus exceptiones impertiat, quas per se nec dat iudex, nec vlla ratione respicit.

§. VII.

Et ita vero formulam FIDE BONA esse expoundam, varia apud veteres autores loca persuadent, quæ apud Florum, Quintilianum, Petronium, Senecam extant, atque in unum collecta sunt a Iacobo Perizonio, (*) Petro Burmanno, (**) J. Freinshemio, (†) Carolo Andrea Duckero (††) viris clarissimis.

§. VIII.

Cuius generis obieruationibus præmissis variæ Doctorum quæstiones concidunt. Nunc enim inepte

rogatur, quare actionibus bonæ fidei non opponantur

actio-

(*) in animaduersionibus ad Sancti Mineruam.

(**) ad cap. XII. Petronii & ad Quintil. declam. XII.

(†) in indice ad Florum.

(††) in comment. ad Flor. Lib. II. cap. I. n. I.



actiones malæ fidei? num omnes actiones ex æquo & bono descendentes ad classem actionum bonæ fidei pertineant? An nulla sit eius commatis, nisi Prætor in formula scripserit dixeritque FIDE BONA? An arbitriæ in omnibus similes sint? an distinguendæ ab istis?

§. IX.

Quippe monitum supra, non eam fuisse iurium auctoribus mentem, ut bonam fidem in iudiciis & contraria bus dispiciendis sic distinguerent a fraude & mala fide. Tota potius nominis ratio ad libertatem iudicis referenda est, cuius arbitrio relinquuntur plura, quæ verbis & facto nude inspectis, non sunt determinata ac fixa: immo supplet ille, quæ videntur omissa, adeoque accurate vniuersa ponderat & estimat, atque ex æquo & late revtroque arbitratur.

§. X.

Inde enim est, quod iudex *arbiter* dicitur, ac talia bonæ fidei iudicia arbitriorum & arbitrariarum actionum nomen ferunt: quod Franciscus Hottomannus passim ex Cicerone probat in comment. ad Orationem pro Quintio cap. III. ubi actio pro socio *arbitrium pro socio* nuncupatur. Et hæc libera iudicia Iurisconsulti demum actiones bonæ fidei frequentius nominarunt, quia ad æquum bonumue oculos convertebat iudex, non solum nihil fraudis admittendo, sed quid *V N V S Q V I S Q V E* contrahentium præstari sibi voluerit, luculenter expendendo.

§. XI.

Ex quo iterum elucet, non illoco ea iudicia viderii bonæ fidei, quæ ex æquo & bono descendunt. Multæ

A 3

actio-



actiones ex æquo & bono ortum suum habent, nec tam
amen istud elogium ferunt. Pleraque, quas inuenere
passim Prætores, ex æquitatis latifundiis profluxere; &
ineptus interea foret, qui actiones Prætorias tali appell-
atione censeret notandas. Vix enim in caussam effi-
cientem hic aciem ingenii intendimus, sed in finem &
exitum, quem considerat iudex, dum *fide bona* accurate,
& sapienti arbitrio pronuntiat, nec verba stricta dunta-
xat legumque & vocum rigorem sectatur; eratque ma-
gni iudicij ac prudentiae, in hisce tenere modum, atque
cuitare frequenter occursantia extrema: NIMIVM ET
PARVM.

§. XII.

Interea vero nemo negat, potuisse actionem oriri
ex æquo & bono; simulatque ratione finis & exitus esse
bonæ fidei. Sumatur de re vxoria actio, & vtrumque
animaduertetur; sicuti vicissim condic̄io indebiti æ-
quum pro fundamento habet, vt ut stricti semper iuris
fuit, mansitque.

§. XIII.

Nec prætereundum, fallere illos & falli, qui inter-
prationem ex æquo & bono (*) iudiciis bonæ fidei
veluti

(*) Äqui bonique voces hac in materia turbas dant. Ex
æquo interpretari significat plene interpretari & inter-
dum plus quam plene. Nemo dixerit, stipulationes
non esse exponendas plene; sed plus quam plene in-
terpretaretur, qui quod in illis κατὰ τὸ ἐγράψαν non inue-
nitur, adderet, aut detraheret. Postremum in libe-
raliori iudicio locum habet: prius in omnibus nego-
tiis.



veluti mancipio addicunt. Vtraque istam participant; diuersissimam vtut retinentes naturam. Quod tanto magis imprimendum memoria, quanto plures inueniuntur inepte & superbissime simul ad hunc scopulum allidentes. Quis enim dixerit cōtractus stricti iuris exponendos esse inique, aut carptim abscisseque? Sunt illi vtique plene interpretandi, & bona fide ac sine fraude & secundum æquitatem iusto examine trutinandi: at in eo versatur *κριτικόν*, an quod in iis non comprehenditur, nec verbis expressum, nec litteris consignatum

cerni-

tiis, & enunciationibus. Deinde æquitas fraudi opponitur. In omni interpretatione fraus exulat. Quin singuli libelli non respnuunt interpretationem æquam & rei conuenientem, hoc est, vt, quid petatur, quid ueue condicatur consideret iudex. Sed cessat in adstrictis iudiciis *diávoia*, puta, ratiocinatio propria, circum spiciens omnia & singula, quæ sibi præstari voluerunt partes, vtut nec verbis expressere, nec facto, & tacite, quoad satis, indicarunt. Vnde qui bona fide iudicat, nec verba sola, nec factum merum contuetur, sed actitata ex vtraque parte, & propositum contrahentium. Gesta vero & actitata non includunt merum factum, quantumuis ex factis & verbis quoque, & natura contractuum simul id, quod sui est officii, obseruent Iudices, caueantque prudenter, ne omissa noceant, nec, quæ sunt expressa, conuentionum naturæ repugnant. Idque est respicere actitata: quod plus continet, quam contemplari verba, & factum: quanquam & hæc non negliguntur; & cogitata interea, & quæ commode atque in usu verum cogitari solent & mos atque consuetudo sic contrahentium secum fert, expenduntur.



cernitur, nec alioquin principaliter & primo obtutu in
contraetibus animo intenditur, supplendum sit ex æquo
& vtrinque adiiciendum bona fide, adiudicandum *omnino*, tribuendumque partibus, post varias visiones &
dimensiones, competenter? Rem uno alteroue exem-
pto declarabimus. Est numerata pecunia ex mensa, an
domo, parum interest. Nihil adiectum de usuris: quid?
quod abesse singas stipulationem & illis soluendis: adii-
cias, in mora esse debitorem: nec enim ille soluit condi-
ctio die: tergiuersatur, ac se quoque condictione certipa-
titur compelli ad dissoluenda nomina. Non est dubiu-
m, quin iudex tanquam vir sapiens percipiat bene de-
bitorem admodum agere iniuste. Fac amplius, credi-
torem facere daminum; aut saltem multis priuari com-
pendiis: quod nunc erit iudicis officium? an pronun-
ciabit de usuris? an de eo, quod interest arbitrabitur?
Et non putem. Mutuum, dicer, est gratuitum sua na-
tura, more, legeque Romana. Iura, perget, sunt vigi-
lantibus scripta. Qui usurarum compendia anhelat,
stipuletur illa sibi, ac solenni carmine faciat promitti.
Quin vix erit satis, pacto creditorem sibi prospexisse. In
mutuo non latent usuræ: pacta non insunt illi: ac cre-
ditum, quia gratuitum, vix admittit pactionem quæ sub-
ruat gratuitum, ne dicam, pacta non obligare. Quo-
circa alio remedio opus erit, quod est adhibendum seor-
sum. In hoc stipulatio est prodita. Stipulatio deest,
nec apparet. Ergo usuras negligit iudex. Habet illi
solum mutui naturam ante oculos constitutam. Non
auscultat is creditoris quermoniis multa de æquitate
continentibus, varia de iniquitate, de damno sibi illato,
de



de lucro intercepto complectentibus. Solum ille de quantitate numerata sententiam fert: cetera omittit, et si perspicue intelligit, non fore iniquum, si & persolverentur ob moram usuræ, creditorque accipiat fructus ciuiles in solatium & redhostimentum illius, quod amisit, quoque acquirere ob debitoris moram ac obstinationem est impeditus. Quod etsi asperum, directum, & quodammodo simplex; ita est tamen, ita fuit, ut ne usuræ deberentur, nisi in stipulationem deductæ. Neque enim illæ in stricta mutui forma insunt, ac pactum adiectum ex interuallo potius oppositum censetur, nec tanquam explicatio contractus considerari potest, aut declaratio, quia tale emolumentum non continet; idque intuitu contractus initi certo determinatum neutrum inuenitur, sed iudicis demum officio certum fieri debet: quod repugnat strictæ mutui figuræ; adeoque cum nec in ipsa natura mutui inueniat usuram, dum petitur certum, quid, quantum & quale; nec pactio, sicuti monitum, ex interuallo in primis addita, obligationem inducat; idcirco stipulatio vtramque paginam conficiet, quæ per se consistit, & contra quantitatem acceptam præstitamque, expendenda est seorsum.

§. XIV.

E contrario quando emptio & venditio celebrata dicitur, multa sane non exprimuntur verbis: quæ interna in proposito contrahentium latitant. Non potest emptor re vendita frui, atque pretium non solvere. Si igitur moras necat, repensem necesse est per usuras; quod ex condicione non præstitit. Mutua hic præstatio

B

statio



statio occurrit animo & voto contrahentium comprehensa initio. Qui emit, aliquid pro pecunia sua exposcit, quod sibi arrideat magis, quam conuenta pretii summa: sicut vicissim pretium enixius desideratur a venditore, quam res venalis. Nunc statue, euinci rem emptam: de euictione si let contractus formula; & facile comprehenditur, iudicem eo oculos suos dirigere omnique ad æquitatis amissim exigere; quia nemo pacientium æquius atque melius exclusit, sed emergentia συμβολή & præstationes mutuo consilio spectatas haud dubie iudicantium arbitrio reliquit uterque. Quod sane est non nuda, & verba simplicia circumspicere, aut factum in transcurlu contueri, sed acta & gesta integra accuratissime & ex æquo ponderare.

§. XV.

Cuiusmodi liberum iudicium propterea æquitatem aut æquum bonumque appellauere Romani veteres, quod verbis & litteris opponatur. Vnde scriptum sequi calaminiatoris esse Cicero in oratione pro Cæcina ait, BONIQUE IUDICIS, voluntatem scriptoris auctoritatemque defendere. Vnde vix mirum, hanc æquitatem dictam fidem bonam, quæ ipsa est ratio naturalis aliterque indicat, quam homines arbitrantur simplices, asperi & directi; sed potius sincere, prorsus ac Cæsar Lib. VII. de B. G. c. 20. dixit, sincere pronunciare, reuera & ex animi sententia cordate & plene ex officio, nec parum prudenter, sed diligenter, nullius iustiore voto neglecto. Non addam plura, nisi hunc e Quintiliano locum *Instit. Orat. Lib. X. cap. 3. p. 935. ed. Bur-*



Burmann. qui maxime ad rem nostram facit : Neque enim se BONA FIDE in multis simul intendere animus totum potest, & quocunque respexerit, definit intueri, quod proposuimus erat. Plura dabit doctissimus Petrus Faber Se-
mestr. Lib. I. c. 24. p. 160. f.

§. XVI.

Ex quo patet, Prætorem in hisce iudiciis dandis non male inseruisse formulæ : BONA FIDE : dummodo ne credas, ubi illam omisisset, stricti iuris euasisse actionem. Vix enim ille lubidini ita indulgebat suæ, nec, si indulsisset, Iudex, credo, peccasset, si ex bona fide, vtierat res ac postulabat æquitas, præter verba & scripturam pronunciasset large, & explanatus esset ar-
bitratus.

§. XVII.

Dico ARBITRATVS. Igitur perquisitio est facienda, an arbitraria actio & bonæ fidei iudicium conuenient penitus? Sunt enim, qui sic argutantur, & summa imis miscent. At enim vero veritati congruit, omnem actionem bonæ fidei continere arbitrium, eoque recte appellari arbitrariam; nequaquam tamen adfirmandum inuicem; arbitrarium iudicium omne esse simul bonæ fidei. Discrimen in eo potissimum versatur, quod actio bonæ fidei statim sit talis a principio, intellige, quamprimum nascitur; cum vicissim reliquæ, quæ spe- ciatim arbitrariæ dicuntur, ex post facto demum arbitrium admittant, neque semper hanc qualitatem adsu- mant, nisi dolus, aut contumacia REI interuenerit, aut A-
CTOR aliam actionem locumue elegerit, ubi iudicem ar-
bitrari sane necesse est, quemadmodum ex æquo & bono

B 2

satis-



satisfieri oporteat certantibus. Est hæc celeberrimi Bituricensis iCti FRANCISCI BROEI acuta obseruatio ad §. 28. *J. de Actionibus.*

§. XVIII.

Vnde inualuisse inter Doctores opinio videtur, quasdam actiones ex interuallo fieri bonæ fidei. Quæ locutio ita intelligi debet, vt ne existimetur, strictæ protestatis iudicia transire in bonæ fidei negotia, eorumque inducere naturam. Accidit hoc potius & ad contingentia refertur, vt ARBITRIO in stricti iuris negotiis fenestra aperiatur, an in rem sint, an in personam? Bonæ fidei iudicia vero semper in personam sunt, nunquam in rem. Arbitrariæ actiones etiam in rem sunt, quin aliquæ ex possessione, vel quasi possessione oriuntur: quædam in personam, vt actio de dolo, & de eo, quod certo loco. Immo quædam in rem non sunt, nec simpliciter in personam, sed in rem scriptæ, vt actio quod metus caussa, & ad exhibendum; sicutque alia est conditio arbitrariarum, quam bonæ fidei, partim ratione iuris, partim ratione originis & initii, ac partim denique ratione substantiæ, itemque qualitatis, quæ est sæpe aduentitia.

§. XIX.

Ad cuius rei melioreni intellectum, fac comparemus actiones arbitrarias cum bonæ fidei sumamusque hoc exemplum: *Primus* vendidit *Titio* emtori C. amphoras vini certo loco tradendas. Non venit in locum conuentum *Primus*. Itaque agit *Titius* emptor, agit ex ipso contractu emptionis & venditionis. Hæc actio non est strictè loquendo arbitriaria, sed bonæ fidei, utpote



te ipso iure competens illi, cuius interest, rem eo loco non fuisse præstitam. Aquilius Iudex bonæ fidei & plene & circumspetere iudicat ac suo fungitur officio. Non est necesse, ut interueniat vox Prætoris, vel auxiliares manus auctori porrigat honorificus Magistratus, aut condat edictum, & subueniat ex æquitate, quæ vel nondum, vel in albo erat significata. Suppedit mutuum, immo potius emptoris ac venditoris consilium propositumque commune iudici sat argumenti, quare circumspicit, quid intersit emptoris, contractum eo loco non inuenisse complementum; quin nec ira ille auertet a venditore oculos, ut ne huius quoque utilitatem habeat pensi, cum vtriusque hic versetur commodum, ac mutua utilitas.

§. XX.

Sed verte stilum, & rem certo loco traditum iri ex stipulatione finges. Non fit, quod est promissum. Et exploratum habeo, haudquaquam per se æquitati locum futurum. Æquitas extra stipulationem est: *bonæ fides* & longa illa circumspetio iudici non est indulta lege. Igitur Prætoris subsidio indiget auctor, indiget quoque ex parte reus, nec prius ex animi sententia ad æquum bonumque peruidendum appellat animum ingeniumque iudex, quam iubebit, aut edixisse fingetur Prætor. Et ita vero arbitraria demum ex post facto orietur auctor. Ultimum hoc refugium est, ac, licet bona fide iudicetur, nequaquam tamen bonæ fidei aderit iudicium vere & proprie tale in ipsa natura contrarius & incunabulis eius latitans, sed aliunde proficiens, atque ex Prætoris ore auctoritateque permanans,

B 3

qui



qui saepe obliquat sinus, & a directo, argumentis sat validis commotus, recedit. Iudex non accedit, quia in emptione & venditione nihil est asperi, nihil stricti, nihil verborum litterarumque tendiculis aut simplici facto alligatum: cum facultatem inspiciendi acta & gesta arbitrio suo habeat, & mutuum propositum ex more & lege contueatur, ac neutrum sine altero examinet, quare potius hoc loco est, quod *accedat*, quam quod a verbis *recedat*.

§. XXI.

Addo ex merito, arbitrarias actiones non semper illam aduentitiam qualitatem recipere, si pareat reus, atque ipsem est, quod sui est officii, faciat. Vix enim in quadruplum condemnabitur metum atrocem inferens, si restituat excussum violenter, ac reddat expressum maligne; sin contra, arbitrabitur profecto iudex, quadruplum deberet restitui, tum ratione rei, tum ratione fructuum. Quibus attentis, vix certe opus erit, ut dicas, actiones arbitrarias magis esse bona fidei, quam quæ tale nomen per se gerunt. Subsidiariæ potius istæ sunt, & Prætoris auctoritati innixa, venientes ex intervallo, nec innatae contractibus, sed illatae aliunde, pululantes ex edicto & ingenio prætoris, non iudicantis; qui vicissim in bona fidei iudiciis per lineamenta ingenii sui totum opus necit, ex quo nihil subduci sine ruina potest. Adeo tota inspicit, tota tractat, & ex animi sententia vere & prudenter huc atque illuc animum versans decidit. Plura non subiicio. Sapienti sat!

§. XXII.



§. XXII.

At hic Rhodus, hic saltus ! Quid enim impulit, quæ res haud dubie , iurisprudentiæ Romanæ architec-
tos, vt has in bonæ fidei , alias in stricti iuris actionum
circulos compingerent ? Qui parum meditantur , le-
gem, aiunt , ita scriptam , nec omnium dari posse ra-
tionem ingeminant . Ego vero aliter componere res
meas soleo , nec qua igitur , sed qua eundem specio mul-
to minus Harpocratis silentium hoc loco censeo affe-
ctandum . Alii multa mouent , plura fingunt , plurima
conuasant , nec quæ subsistendum , intelligunt . Vnde
post habitis , quæ passim feruntur in medium , sic ratio-
nes subduco , opinorque .

§. XXIII.

Etenim Romani primum simplices erant parum-
per, & asperi, quod eis adhæreret semper aliquid ex il-
la colluui aduersarum nationum in vnum aylum con-
fluentium . Ac quamuis nonnihil culturæ accederet
sub Regibus , ac populus adolesceret ; fecit tamen re-
giam manus , qua paullo licentia ac durius premeban-
tur , vt Regibus expulsis in nouam Rempublicam trans-
irent , Patrum nomine penes Nobiles residente , quibus
infesta reddebat plebs , variis suspicionibus agitata ,
ne in nouam seruitutem redigeretur sub specioso liber-
tatis obtentu . Quocirca nouas hæcce leges cupiebat ,
vt pote incerto iure regnata . Cuius voti etsi particeps
fiebat , leges tamen erant peregrinæ , cum parum fidu-
ciæ collocaret in Magistratibus suis , sicque exteris iis
censeret quodammodo præferendos . Vbi vero lex ,
ibi actio ; recteque rationes ineunt , qui actionibus
non



non fuisse destitutos credunt (*) Quirites, vtut formas actionum nondum haberent solennes, quas vocabant *legis actiones*.

§. XXIV.

Cum his caue confundas actiones stricti iuris. Non est fere actio bonæ fidei, quæ suam non habuisset formulam. Ipsæ emptiones & venditiones iurisconsultorum interuentu suspiciebantur, siue filia elocanda, ac dos dicenda illi consulti, monente iam Cicerone Lib. I. de Oratore c. 56. Quare si omnes formulariæ actiones stricti fuissent iuris, nulla sane bonæ fidei toret vñquam. Formulæ artificium spirabant; strictum ius rude erat, directum, sine ingenio, & fide bona, hoc est, æquitate supplente, quod deest, diminuente, quod superat. Quin nec efficiebat exquisitissima actionis figura, verborumque antiquorum & solennium delectus, vt ne iudex suo officio fungeretur, si res ferret, ac mitte & moderatam posceret. Quod in errorem contra euntes induxit, hoc est. Animaduerterunt, in strictis iudiciis iudicem includi formulæ: igitur formularios contraëctus putarunt stricti iuris. At at formula non semper sonat illud solenne. Formulæ omnes actiones vocabantur; quid? quod ipsi libelli speciem futuræ litis demonstrantes. Cognoscere formulam est cognoscere actionem. Ergo dum Seneca Lib. I. de Benef. cap. VII. FORMVLAE INCLVDI iudicem scribit, nequam eum syllabarum aucupio & vocum cantui additum,

(*) v. Schubartus de fatis iurisprudentiæ Romanae p.
333. l.



ctum putat, sed potius ad verba formulæ directa
adstrictum : quod in bonæ fidei iudiciis non est,
quamvis verborum catenis tendiculisque non destitu-
antur. Libera quippe Iudici & nullis alligata vin-
culis religio relinquitur, vniuersaque ipsius pruden-
tiae committuntur. Potest aliquid detrahere, aliquid
addicere, & sententiam suam, non prout lex, & sum-
mum ius, sed humanitas & pacientium intentio flagi-
tat, regere. Itaque regit, non regitur : libera voluntas
dominatur, non seruit; secundum formulæ contenta iu-
dicat prouide, non *sub formula* : incerta determinat,
nec de certa duntaxat pecunia pronuntiat. Quamob-
rem arbiter dicitur, non iudex. Solennes verborum
cantus partes adhibebant, quibus includebant petita.
Ad hæc respicere cogebatur Iudex, cum si bona fides
locum inueniebat, tum si ius strictum. Solum id in-
tererat, vt in hisce iudiciis ultra petita non procederet,
in illis pro re nata aliquid adiceret, aliquid demeret.
Ex quo intelligitur, quid sit apud Ciceronem pro Ro-
scio Comœdo c. IV. deberi ad libellam. Nullus hic terunci-
us addebat. Stipulatio norma erat : conuentum,
nuncupatumque præstabatur, ac præstandum iniunge-
batur. Ne latum vnguem quidem recedebat Iudex a
petito bene interea intellecto ; amittebatque actor aut
totam litem, aut obtinebat. In altera vero specie ne-
que nihil consequebatur, neque tantum læpius, quan-
tum petitum, neque minus rursum, quam quantum
æquius melius. In primo nullum ingenium singulare
desiderabatur: in postremo magna prudentia opus e-
rat. Istud simplex videbatur, hoc prouidentia & æqui-
tate

C



tate plenum, nec lege, nec verbis, nec litteris, nec certa præstatione fixum terminatumque.

§. XXV.

Qua ratione proprius ad veritatem nos confidimus accessuros. Quam diu enim Romani allium olebant ac cepas, acumine minus pollentes, verba illi & *τὸς ἐντὸς* vrgebant: æquitatem vero, quæ voluntatis omnes coniecturas liberaliori interpretatione admittit, nihil fere faciebant, a summo iure discedere nolentes. Quare haud male existimat Wesenbecius, suisse, qui contractus omnes cuperent strictos, indeque profluientes actiones iuris stricti. Nec est inficiandum, paucos initio patrocinium æquitatis suscepisse, plures defensionem verborum & iustitiae; donec tandem medium placeret, ut nec omne ius strictum pelleretur foro, nec quoque bona fides, hoc est, plenioris interpretationis æquitas penitus negligeretur.

§. XXVI.

In primis autem plebeii timebant homines, ne *τὸς ἐντὸς* negligerent iudices, incertum haberent ius, & ab eorum arbitriis penderent fortunæ suæ omnes. Propterea, inquietabant, scribi ius, idque circō contrahi, ut, quod dictum scriptumue, seruaretur; quod vero esset neglectum, negligeretur: expressa prodesse, non expressa nocere. Saltem talia in Ciceronis libello *de Oratore* leguntur, occurruntque veluti in aperto campo libera Romanorum disputationes, in vtramque partem, puta, ut alter ex æquitate, alter rursum ex iuitia & iure controversas quæstiones decideret, donec tandem usu inuale sceret, ut in contractibus cum maxime partim angu-



angusta verborum & factorum forma placeret ; partim iudicibus laxarentur habentæ , qui actitata inspicerent, & propositum in vnum conuenientium curatius pensarent.

§. XXVII.

Vnde hæ Iurisperitorum rationes sunt auditæ. Qui verbis contrahit, in illa compingat animi sui sensa, quodue præter illa est, alienum censeatur, aque contractu ac stipulatione remotum. Qui litteris obligare sese, aut alterum cupit, in litteris exprimat, quæ sibi utilia, ac necessaria. Extra has nihil attendatur amplius. Nemo iudicum contempletur pactum, quod extra contractus schema occurrit. Ad illa ne dignetur quidem respicere, quæ non sunt signate exposita; quoniam exponere potuit, & voluisse exprimere præsumitur, qui stipulatur, ac per litteras obligari, alterumque desiderat obligatum. Si quid omisit, suo malo omisisse credatur. Nemo eum, vt scriberet, aut solenniter stipularetur, & responderet, impulit, aut coegit: ergo quoque nihil detrahatur, nec apponatur. Iustitia est, stare verbis, iustitia stare litteris : hic τὸ ἔγγραφον, simplex, vniiforme, quod æquitatis tractatum respuit, non sine causa vrgeri. vid. Cl. Menardus ad orat. pro Roscio Comæd. cap. 4. p. 233.

§. XXVIII.

Ac quamlibet in mutuo nec verba requirantur solennia, nec stipulatio, nec litteræ per se; nemo tamen nescit, mutuum fieri certum per numerationem, appensionem, admensurationem. Quantitas rei ad usum cum abusu concessa in puncto consistit; nec plus, nec minus



nus est reddendum. Non hoc, quia donare nemo præsumitur, quando mutuum dat. Non plus, quia gratis conceditur rei fungibilis usus. Mora extra mutuum est. Qui pecuniam tñenori dare statuit, habet, unde desiderium expletat, & compendiis suis prospiciat. Mutuum ipsum eo non pertinet. Omissum nocet. Noceat igitur, cogitet iudex; immo ita iubetur cogitare. Qui moras necit, compellatur remediis, quæ suppeditat iustitia. Æquitas extra formulam est & negotium mutui, ut pote in quo nullæ præstationes ulterius occurruunt citroque, eoque in verbis, litteris, ac natura contractus consistit.

§. XXIX.

Verum in contractibus, ubi mutuae præstationes utrinque ex consilio flagitantur, ubi verba nuda omni forma destituta occurunt, ubi fiducia, amicitia, mutua indigentia pro fundamento est, ubi proportio minimum geometrica mente depingitur, nec ob amicitiam, quæ proponitur, ita omnia ad viuum exprimuntur, nec ob breve sæpe temporis spatium, & festinationem exprimi commode queunt, ingenio suo, cum ad actionem deuenitur, indulget iudex, quia partium voluntate incerta relicta sunt pura, ad certum redigenda interea, si trutinentur cum cura, quæ, si summa industria omnia perpendissent partes, expressissent haud dubie ipsæmet; indeque est quod bona fidei iudicium datur pecuniae incertæ.

§. XXX.

In strictis verbis vanescit hæc præsumtio, quia scriptis sunt usi verbis, aut saltē ad regulam compositis;



sitis & expressis, quam indicat ius; eoque summo iure vti dijudicarique negotia voluisse sua, haud vana capitur coniectura. Quidquid in iis paret, aut apparet, ad id unusquisque obstringitur & condemnatur. Hinc formula Prætoris: SI PARET CONDEMNAT. Quod non cernitur clare, pro non scripto, aut non nuncupato habetur. Hinc iudicium hoc est pecuniae certae.

§. XXXI.

Noli dicas: Sic malitia ac dolo fenestram esse appetam; ac simulationi, dissimulationi, & circumventionibus locum tribui, etiam cum stipulatio intercedit, cum litteræ interueniunt, cum mutuum initur, cum omne studium ac diligentia adhibetur; minime que incognita peritioribus esse, quæ ex Horatii manauerint vena *Sermon. Lib. II. eclog. 3. v. 69.*

Scribe decem a Nerio: non est satis: adde Cicutæ

Nodo sit tabulas, centum mille adde catenas;

Effugiet tamen hæc sceleratus vincula Proteus.

Cum rapias in ius malis ridentem alienis;

*Fiet aper, modo avis, modo saxum, &c., cum volet,
arbor.*

§. XXXII.

Haud temere etenim animaduerto, voluisse Quirites a primis reipublicæ incunabulis, ne sui villa ratione a fide desciscerent. Id Fauorinus Philosophus apud *Gellium* in defensionem legum patriarcharum adulit, nullum peius in

C 3

Ro-



Romana ciuitate facinus habitum, quam in quotidiana vita atque officiorum vicibus alium fallere. Nec latet, Numam Regem ad religiosum cultum fidei nomen transtulisse, eique templum dedicasse. Ita enim sperabat fore, ut per spiramenta temporum ciues sui magis ac bona fide mitescerent, nec impia fraus, malitiaque ac litium perpetuus fomes totam urbem peruaderet. Non adscribamus Dionysii Halicarnassei verba in *libris Antiquitatum* passim obuia, in quibus iurisurandi sanctioris loco **FIDEM** Romanis habitam indicatur. Ab ista veneratione vero multos declinasse demirari desinent, qui damnolum omnia imminuere diem intelligunt, & progeniem fieri vitiosorem, probe percipiunt. Proinde nihil noui dicitur, quando stricti iuris contractibus abusos quam plurimos pronunciatur; cum sane ius non fuerit in caussa, sed nequior posteritas a veterum more & disciplina sese auellens. Ius enim Quiritium non merum ius est naturae ac gentium: haud pauca e statu Reipublicae & animorum diuersis motibus atque utilitatum praesentibus rationibus profluxere, item a suspicio-nibus, vtut saepe male coharentibus, a disputatione fori atque Oratorum argumentis plebem hac atque illac impellentium; vsque dum diuisio contractuum bonae fidei & stricti iuris ob munus Praetoris & iudicis distin-ctum in consuetudinem iret, vt & parte Reipublicae malis medela adferretur. A qua differentia varia sunt repetenda, quæ nunc parum intelligentibus παράδοξα vi-dentur.

§. XXXIII.



§. XXXIII.

Quo loco tamen vix omittendum, etiam Romanos inque primis Prætores in peius eunti mori obicem posuisse, ac partes quoq; contrahentes clausula sibi in strictis iudiciis consuluisse: DOLVM MÅLVM ABFVTVRVM; atque Aquilium Prætorem demum actionem de dolo & Cassium exceptionem doli inuenisse, quarum primam malitiarum omnium euerriculum haud vane nominat Tullius. (*) Soli namque stricti iuris contractus remedio hocce amplius adhuc indigebant; siquidem omisissent contrahentes clausulam, nec de mora futura, nec de malitiarum omnium genere cogitassent. In ceteris iudiciis actio, vel exceptio Præatoria dolii necessaria vix erat, quum esset, qui ex sui officii natura deceptis succurreret, atque ex animi sententia auxiliarem circumuentis dextram porrigeret.

§. XXXIV.

Apposita namque Quiritium disciplina cauit, ne in conuentionibus, vbi religioni, verecundia & amicitia pacifcentium pleraque relinquebantur, nec verbis singula, nec litteris certo, nec lege determinata obserabantur, mutuis interea præstationibus superantibus, benignior iudicis interpretatio deficeret, quæ remoueret iniq.;, quæ adiiceret & qua, quæ suppleret non expressa & suis singula ponderibus exigendo vitiorum mederetur feroi, ac moræ & desidiae & male suadæ auaritiæ vel virtus soluendas, vel fructus imponeret pendendos, ac pro re nata ad id, quod interest præstandum adigeret i-

gna-

(*) de N. D. lib. III. c. 10.



gnauos doloseque versantes prorsus, ac si omnia ista in stipulationem fuissent deducta. Idque est, quod Paulus affirmat L. 7. ff. de negot. gest. T A N T U N D E M in bona fidei iudiciis valere iudicis officium, quantum in stipulatione nominatim eius rei facta interrogatio. Vnde Prætoris vox in huiusmodi actione : SI PARET TITIVM EX VENDITO CENTVM SEIO DARE OPORTERE, C A L V S IVDEX EX BON A FIDE CONDEMET.

§. XXXV

Ex quo tamen neutiquam collendum, inde bona fidei actionum nomen abscisse manasse. Habebat plus argumenti Prætor, quam obrem iussui suo eas adseret voculas; idque prodit Cicero Lib. III. de Officiis cap. 17. cum auream illam, vt vocat, veterum formulam proposuisset, VT INTER BONOS BENE AGIER OPORTET ET SINE FRAUDATIONE. Sed, inquit, qui sunt, boni & quid sit bene agi, magna questio est. Hinc pergit : Q. quidem Scœuola Pontifex maximus summam vim dicebat esse in omnibus in arbitriis, in quibus additur ex fide bona; fideique bona nomen existimabat manare latissime, idque versari in tutelis, societatibus, fiducia, mandatis, rebus emptis, venditis, conductis, locatis, quibus vitæ societas continetur: in his magni esse IUDICII (*) statuere (præsertim cum in plerisque essent iudicia contraria) quid quemque praestare oporteret. Qui locus grauiter est expendens

(*) Legunt fere omnes magni iudicis, ipseque Gronousius. Sed diu est, cum monuit Rittershusius legendum est magni iudicij, quem malo sequi, quam facere cum ceteris.



dendus. BONI sunt hic contrahentes. Inter eos oportet bene agier. Quod ita exponendum: Non omnia hisce in negotiis sigillatim exprimi solere, nec commode ac iuris sensu posse. In bonitate mutua vniuersos acquiescere, qua sine vita societas nequeat consistere; nec præstationes interea ab utroque latere signentur vniuersim. Itaque, uti boni debent, agere, circumspicit iudex, circumspicit in tutelis, perpendit in societatibus, cetera. Idque magni iudicij est. Nosse enim oportet finem contrahentium, scopumque huiusmodi negotiorum, vbi vix omnia queunt notari, multaque in incerto solent cubare redigenda ad certum iudicantium ac peritorum hominum prudentia, quid quemque oporteat præstare: et si quæ ad *essentiam* vniuersiūque contractus pertinent, conuentione sua fixa & certa efficiant, qui vendunt, emunt, locant, conductunt, reliqua; aut lex generatim doceat, quemadmodum se gerere tutores debeant, ac pupilli vicissim. Quapropter iudicis officio continetur, omnia hæc ut introspiciat accuratius sententiam ferat sapientia sua dignam.

§. XXXVI.

Dices? Ergone qui mutuum ineunt, stipulantur, ac promittunt, obligationem nominibus contrahunt, aut litteris, boni non sunt? Et ego bonos esse regero nec bonitate deficere; sed hoc loco boni sunt, qui ex æquo & bono ac mutua fide suas diiudicari conuentiones volunt: qui non omnia signate describunt, & ad viuum resecant, sed, ceu boni bonis, fidem sibi injuntem habent; & iudicem quoque ad mutuam bonitatem.

D

ac



ac grauissimam liberalitatem, (vt Cicero vocat *bonitatem*) respicere cupiunt. Et talis vero bonitas in strictis contractibus, in quibus est mutuum, neutquam inuenitur. Exactissime quippe partes sanciunt, quid, quale, & quantum sit præstandum. Nihil hic inuenitur incerti, nihil bona fidei in genere ex utroque latere reliatum: præcipue cum contractus stricti iuris, si non omnes, plurimi tamen *μονόπλευροι*, seu unilaterales sint. Quæ res facit, vt reciprocæ *caussæ*, seu præstatio in sumum abeat, nec mutuum, nec stipulatio interea in irritum cadat, tametsi in mora sunt debitores, qui cogi cetero ad officium faci e possint secundum contractus legem actionibus cuique negotio propriis ac certis, quia obligatio est certa, & promissi ac munieris immobilis ratio. Hinc tales acti one iudicia audiunt simpliciter, ceteræ, in quibus bona fidem, hoc est, liberalior potestas obtinet, iudicia sine *LEGE*, arbitria, libera iudicia. v. Cicero de officiis Lib. III. cap. 15.

§. XXXVII.

Cuius generis expositio, quam adulit Scæuola Pontifex, quamquam vix displacebat M. Tullio; non ista tamen inducit animum, hisce iudiciis omnem fidem bonam absolui, aut nihil amplius desiderari a Philosophis posse. Ostendit ipse met, quam sit processum longius in Ædilitiis edictis, vbi non solum abstinentia maliitia superaddita, verum etiam omnis vitiorum dissimulatio merito remouetur, quoniam ita nemo agere bonus potest, vt ex alterius prædetur *inscientia*. Olim autem tam seuerus ni fori tritura reperiebatur nullus, alioquin ædilium edictis non fuisset opus, si vitiorum dissimulatio



tio in iumentis ac seruis, aut aliis rebus vendendis pro
fraude suisset habita. Hinc coniectura capit, bonam
fidem longius esse ab Ædilibus hac parte propagatam:
quod & Donello arridet in *commentatione ad ædilitium
edictum*; estque simul inde adprobandum, celebre illud
edictum Q. Mutii ætate vix innotuisse, deinde vero a
ICTis quoque in progressu animaduersum, *redhibitionem
etiam empti IUDICIO CONTINERI l.i. §.i. l. ii. ff. de
act. empt.* Adeo limites bonæ fidei liberaque iudicandi
facultas indies protendebantur, cum philosophiæ ope-
ram darent Iuris auctores, & ex Panætii schola, tanquam
ex equo Troiano, prodiret præstantium Iurisconsulto-
rum nobilis caterua. Quin inde deducas augmentum
actionum bonæ fidei. Temporis quippe progressu in
negotia humana, atque ipsam rerum naturam, quæ est
iuris sons, & usum rerum moremque penitus intue-
bantur Romuli nepotes & ad maiorem moderationem,
ac culturam res suas traducebant. Errantque omnino,
qui non alias actiones bonæ fidei admittunt, quam quas
Cicero ex Q. Mutio commemorat. Rectius Hermann-
nus Vulteius (*) calculos subducit, quum omnia stricti
iuris iudicia in bonæ fidei potuisse mutari autumat. Sal-
tem de iure gentium id verissimum est: quamlibet Iuris
Romani circuli non ferrent, ut, quod diu inoleuit, aliis
que pluribus superstructum fundamentis fuit inque iu-
ris artem transiit, uno ictu exscinderetur. Quare man-

D 2

fit

(*) ad tit. C, ubi conueniat, qui certo loco dare promisit.
p. 299. l.



fit distinctio inter strictos & bonæ fidei contractus eademque differentia durauit in actionibus

§. XXXVIII.

Prorsus enim opinor, non alias hoc nomen ferre, quam quæ ex contractu vel vero, vel etiam quasi descendunt. Reales, immo in rem scriptæ, ac possessoriæ actiones & testamentariæ, qua testamentariæ, quid? quod prætoriæ omnes ad hoc stabulum minime pertinent, iisque, qui contra sentiunt, arbitrarias, vel æquum bonumque in genere cum bonæ fidei actionibus confundunt: quam tamen commixtionem evitandam monuimus supra: quod luculentius pervinci Broeus in commentario ad *institutiones* supra dilaudato.

§. XXXIX.

Atque hinc etiam est, quod Iustinianus nullam, nisi quæ vel directe ex contractibus, vel indirecte, seu vtiliter pullulat, in bonæ fidei classe reposuit, quasque non indicauit, tacite dicto sub nominatis modo comprehendit. Bonæ fidei, inquit Imperator, hæ sunt: *Ex empto, vendito, locato, conducto, negotiarum gestorum, mandati, depositi, profocio, tutelæ, commodati, pignoratitia, familie herciscundæ, communi diuidendo, præscriptis verbis, quæ de auctimato proponitur, & ea quæ ex permutatione competit, & hæreditatis petitio.*

§. XL.

Quocirca nemo dubitet, quin contraria iudicia in iis, quæ Iustinianus recenset, lateant. Ipse Q. Scæuola contrariorum iudiciorum suo iam tempore mentionem iniicit, neque auditum est sane, bonæ fidei negotia in stricti iuris transisse vñquam & vsquam: licet statua-



statuatur, stricti quæ fuerant iudicii, quodammodo bonæ fidei esse effecta. Sed fallerentur iterum, qui hic nimis laxi, & benigni ac leuibus rationibus commoti admitterent alias, e. g. *finium regundorum*, propterea, quod actio familiæ herciscundæ, & communii diuidundo compareant hac in classe. Valde enim probabile est, extremam bonæ fidei haud esse, quia omissa. Unde indaganda causa: quæ illico sese aperiet, si pensetur, in actione finium regundorum peti partim certum quod sit restituendum, partim etiam de delicto quæstionem esse, vbi *bonafides*, seu liberalior interpretatione locum non inuenit. Actio familiæ herciscundæ & communii diuidundo fere ex societate proueniunt, quia communio rerum & familiæ, seu hereditatis societati quodammodo similes sunt, in qua præstationes occurruunt incertæ. In finibus regundis vero nulla societas cernitur, nec singi villa potest. Interuenit hic delictum plerumque, siue verum, siue quasi: quia fines confusi sunt; vtut nondum intelligatur perspicue, quis confuderit. Propter hanc obscuritatem & arbiter, seu arbitrator interuenit, & mensor. Quin publicæ quoque rei utilitas sese immiscet, adeo ut dicta finium regundorum actio magis fundo, quam personis competere videatur. l. 4 §. 5 *fin. regund.* sive in rem est certe, quatenus vterque *affinis*, quod est intra pedes quinque, sui dominii esse vindicat. Cui non obest, eam quoque in personam dici, & esse; haberique rationem eius, quod interest. Facile enim reponitur, id non intendi animo, quando finium regundorum actio instituitur. Nam aut ante litem contestatam fructus perce-

D 3

pit



pit alteruter, aut post litem contestatam. Si bona fide ante iudicium, lucrabitur illos, quiconsumisit : si mala oportet condici: hæcque condicio ad actionem finium regundorum non pertinet ; quæ haud dubie mens est Pauli *I. 4. §. 2. ff. fin. reg.* Quod autem post iudicium acceptum restituendum, id ad actionis primordia perperam refertur : nec sine delicto est, qui post litem contestatam, vel acceptum iudicium , aliquid commisit, aut fructus percepit mala constitutus in fide. De hisce restituendis aut refundendis arbitratur Iudex, idque officio eius continetur *§. 6. J. de officio Iudicis.* Sed merito quaeritur, an præstatio eius , quod interest, statim iure obligationis & actionis contineatur, nec arbitraria magis sit, quam bonæ fidei?. Sæpe enim arbitrium iudicis interuenit in actionibus in rem , FINITO de re recuperanda IVRGIO: & istamen deciperetur admodum , qui actiones hasce sensu Quiritium appellaret bonæ fidei. Aliud ζύτηνa occurrit, an potuisset fieri bonæ fidei, ceu hereditatis petitio ? quod affirmant multi. Sed plus difficultatis hoc sese loco offert: quod indicatum copiose.

§. XLI.

Dum dico: plus difficultatis, illico patefit, non caruisse rem omni difficultate, quando Iustinianus hæreditatis petitionem bona fidei decreuit esse. Nam vtut personales in ea occurrunt præstationes; non illico tamen occurrunt mutuae , seu reciprocæ, quemadmodum in communi diuidundo & familiæ herciscundæ negotio, qui cum societatis imago vel copulatur, vel copulari commode potest. Hæreditatis posse

fessor



seffor vero nec contraxit cum herede vere, nec vlo specie, aut imagine quasi contraxisse cum illo fingi potest. Ergo idea contractus faceſſit. Vbi nullus contractus vel verus, vel quasi, ibi nulli actio bonæ fidei. Et tamen Iustinianus bonæ fidei voluit. Qui vult noue & præter ius vetustum, is aliquid nouaffe merito creditur. Quid igitur nouauit? Hoc solum, vt vna actione includetur possessoris hæreditatis contrarium ius, qui alioquin, iudicio [hæreditatis] finito¹, impensas in hæreditatem factas, non autem retentas condicere potuit, si bona fide in hæreditate institut, quasi pari & communi inter hæredem & possessorem cauſa. Itaque quasi contractum aut finxit simul, aut, si hic in mentem ei non venit, inepite decreuit. Simul. Nam veteri quoque iure negotiorum gestorum actio hæreditatis possessori dabatur seorsum, siquidem obligare hæredem voluit: cum alias non fuisset negotiorum gestor. Dabatur quoque condic̄io ex æquitate. Sed æquitas hæc nondum erat sufficiens, vt fieret actio bonæ fidei. Prudentes quidam in disputatione fori ita autumabant. Sed opinio querundam nondum erat lex. Itaque Iustinianus superueniebat, & disputantibus interponebat ſeſe. An vero is quasi contractum fingere & pro auctoritate fabricare potuerit, alia quæſtio eſt, & indaginis altioris. Qui fingit naturæ rei fingat conuenienter; cum fictio imitetur naturam rei. Atqui natura contractuum vix patitur, vt fingatur conſenſisse, qui consentire nec voluit, nec potuit. Quomodo autem consentire voluit, aut potuit hæreditatis possessor, qui de alio hærede non cogitauit, nec, si in bona fide fuit, cogitare commode potuit, vt sibi



sibi restituantur impensæ? Ne garrias: Imperator hoc voluit tanquam Legislator. Statim enim obuertitur in te, Legislatorem esse ratione præditum, qui sine ratione sufficienti faciam nequicquam. At sine huiusmodi ratione, inquis, fecit. Bene, aio, sed ita non orientur hac parte ius rationabile. Finxit, pergis, sic debuisse cogitare possessorem. Igitur bina finxit Imperator. In iure vero duplex fictio non solum est suspecta, sed & peregrina. Finxit ergo tua sententia, possessorem ita debuisse subducere rationes; ac deinde, et si eo non subduxit pacto; tamen statuit, quasi contraxisse cum hærede, aut hæredem cum possessore: quod παρεδοξον. Ceterum ferri potest, si aliter arguas, & iudici præcepisse Imperatorem dicas, vt simul iudicet de eo, quod hæreditatis possessor primum animo non intendit; et si nunc ipsi hoc gratum est acceptumque. At tum habebis actionem bonæ fidei, quæ neque ex vero, neque ex quasi contractu venit. Et patior hoc: dummodo ne inferas, dari igitur actiones bonæ fidei, quæ sint in rem. Neque enim singularis Iustiniani voluntas illico omnes actiones in rem efficiet bouæ fidei: cum non sit Iustiniani, cogitare semper accurate, & bona fide; vt taceam, singularia neutiquam protendi. In finium regundorum iudicio vero, neque tam liberalis fuit in singendo, neque, si ingenio suo indulsisset, aut supercilie Imperatorio tantum tribuisset, sine insigniori stoliditate id sane potuisset comminisci.

§. XLII.

Quapropter de dote actio restat. In hanc enim, quæ est ex stipulatu, transfusa est actio rei uxoris, eoque



que actio stricti iuris bonæ fidei creditur facta. Quod quemadmodum sit præstatum, clarissimum enunciandum. Et erant vero mulieri duas actiones repetenti dotem. Una vocabatur rei uxoriæ, altera ex stipulatu. Illa ex natura negotii fluebat, altera ex stipulatione expressa. Res uxoria est matrimonium, non patrimonium, sicuti recte contra Hottomannum notat Giphanus, idque ex Plauto probat & Gellio; nec desunt plura veterum loca. Sed natura matrimonii vero poscebat, ut dos constaret, quamdiu matrimonium esset. Hoc sublato, vel soluto, dos consistere amplius non poterat. Quare illam a marito eiusque heredibus vel mulier, vel pater coniunctim, vel solus repetebat actione rei uxoriæ ex regula. Nam exceptiones hoc loco vix continebantur. At habebat vicissim vir actio nem contrariam de utilibus, vel necessariis impensis in rem dotaem factis, perinde ac sic inter virum & uxorem sic fuisset contractum. Nec deerat marito ius retinendi aliquid pro liberis, ob res donatas, ob mores inconditos: atque interea tamen non tota, si in rebus fungibilibus consistet dos, simul, sed annua, bima, trima die, hoc est, tribus pensionibus, primo, secundo, tertio anno soluebatur: ut præteream, non plus potuisse exigia viro, quam facere poterat. Quæcum mulieribus viderentur dura ac molesta, cœperunt illæ stipulatione sibi magis utili consulere de reddenda dote; eaque ratione minus frequentabatur rei uxoriæ actio. Quaenam per Iustinianum sublata, nomen quoque euanuit; cumque illa in eam, quæ est ex stipulatu, sit transffusa, atque haec appellaretur actio de dote ^{κατ' ιζοχνην} mirum non est, ju-

E. 1. 1. 1. 1. 1. 1. di-



dicium rei vxoriæ latere nunc , & inueniri simul inser-
tum in actionis de dote schemate. Quare restat excu-
tiendum, quid mutauerit Imperator , quid non? Et
adsentior Goeddeo , (*) non tam stipulationem bonæ
fidei naturam induisse , quam rei vxoriæ actionem illi
agglutinatam retinuisse , quam habuit, qualitatem , ita
vt actio de dote nunc quasi sit composita , inque illa
coniunctim inueniatur , quod pro mulierum fauore
olim erat in vtraque, inque neutra deprehendebatur in-
tegre , atque vniuersim. Ergo stipulatio occurrit hoc
loco , vbi nihil sibi est stipulata vxor ; vnoque anno sol-
uitur, quod alioquin bima, trima die dissoluebatur ; re-
tentionibus pluribus fere sublatis (**) actione que in hæ-
redes mulieris promiscue transeunte: sicuti rem totam
effusa confusione (***) explicat ipse Imperator in l. vn.
Cod. de rei vxor. actione. Ex quo interea claret, non
ipsam stipulationem in bonæ fidei actionem transiisse,
sed hoc potius beneficium a rei vxoriæ actione manaf-
fe, venireque ex copula , vt , quod ceteroquin in stipu-
latione non est , actio rei vxoriæ impertiat illi , & quod
deerat huic, suppleat vel vera , vel commentitia stipu-
la-

(*) De contrahenda & committienda stipulatione p. 845. f.

(**) De his adiri debet Jacobus Gothofredus ad Reg. l.

73. §. 3. vbi quam fuerit vxorius Imperator, breuiter,
sed solide probat.

(***) Tali elogio Imperatorem mactat Franciscus Bal-
duinus in *Iustiniano*. Nec paucæ sunt, quæ repre-
hendit Wissenbachius in *comment. ad Codicem b. l.*
itemque Dominicus Aulisius *ICtus Neapolitanus per*
acutus ad tit. Soluto matrimonio quem. dos per.



latio: atque ut matrimonium s̄epe communionem bonorum inducit; ita hac parte binas inter illas actiones, paucis reffectis, contracta est societas, ac reciproca bonorum, seu beneficiorum omnium collatio, communictioque: quanquam incognitum non est, vnde defluixerint singula, & iterum vniuersa.

§. XLIII.

In quo an sit recte ac sapienter versatus Imperator, alia questionis species est. Neque enim habebat is necesse, ut vnum in stabulum concluderet diuersa, cumque Legislator esset, humano capiti ceruicem equinam iungeret: in primis cum leui opera & paucioribus verbis potuisset statuere, quid in repetenda dote vtrinque in posterum foret obseruandum. Huiusmodi connubia iuridica enim non tam opitulantur languenti iuris arti, quam eam vexant; interque varias comparationes id tandem efficiunt, ut tantum non Oedipi sit, adsequi verum legis sensum. Sed ita erat ingenium Iustiniani comparatum, ut hercisceret coniuncta & rursum iungeret recta: addens aliquando non nihil de sua culina.

§. XLIV.

Ceterum ea mihi opinio sedet, plures actiones bonæ fidei non esse, quam quæ sunt relatæ a Iustiniano, aut cum relatis æctissimo nexu iunctæ, ceu utiles, & contraria: et si multos secus sentire constat, ita, ut actionum bonæ fidei numerum figi non posse penitus habeant persuasum. Sed decipiunt eos & qui bonique voculæ; nec non falsæ de bonæ fidei iudiciis, definitiones aliqua minus accurate perpensa. Cape exemplum ab actionibus, quæ dicuntur præscriptis verbis. Contendit *Egyptius*.



dius Hortensus in Comment. ad inst. b. t. qui admodum liberalis est in admittendis bonæ fidei iudiciis, iurisconsultus ceteroquin acer & doctus, non solam æstimatoriam, aut quæ est ex permutatione, id nominis ferre; sed etiam reliquas, quæ ex contractibus do ut facias, facio ut facias, facio ut des permanant, eodem censu venire. Nec minori molimine iurisconsultus Hispanus Hieronymus Orosius, seu *Oroz in apicibus iuris Lib. III. cap. IX. n. 8.* persuadere hoc dissentientibus conatur, qui istas eo numero expellunt. Verum, si quid video, in eo labuntur Viri præclari, quod in contractibus innominatis ceteris συνάλλαγμα animaduertentes illico conclusere: *Ergo sunt contractus bona fidei.* Etsi namque συνάλλαγμα conventionem comple-
tetur & præstationem vltro citroque; non sunt tam
enones contractus innominati ita comparati, vt
mercimonii caussam habent & negotiandi formam, &
vitæ societatem adtingant, & in conuenientium recipro-
ca bonitate acquiescant, præstationes relinquendo
incertas. Permutatio vero & æstimatorius contractus
sicuti hisce requisitis non destituuntur, ita bonam fidem
non solum & liberaliorem iudicis sententiam ad-
mittunt; sed & ad vitæ societatem propagandam aperte
faciunt. Quæ vera ratio Q. Scæuolæ est a Cicerone
indicata, in qua latitant reliquæ rationes a Doctoribus
adductæ ad vnam omnes.

§. XLV.

Propterea enim in formula Prætoria adhibebantur
verba prorenata: ex FIDE BONA, vel ex A&QVO &
BONO, vel Q.VOD A&Q.VIVS MELIVS; obseruatur
que porro, tam laxam interpretationem conuenire &
con-



contractuum, & actionum naturæ, quia partes contrahentes non omnia ita signarunt abunde, sed pudori & verecundiæ relinquerunt, quæ sint secundum scopum & votum cuiusque præstanta vicissim; cum is minime bonus sit, qui facit nihil, nisi sui caussa, in primis vbi negotium occurrit διπλευγον, ad quod utrumque latus ut respiciat iudex, & quid & quantum alter alteri præstare debeat, iustus ponderibus exiget, æquum omnino est. Contraxerunt enim ceu amici & boni, ita, ut non solum noceatur nemini; sed etiam commodi ab unoquoque mente consignati honesta ratio habeatur. Atque hoc est, quod Cicero lib. II. de offic. c. 12. indicat: *Societatem tuerus, qui ius suum cuique tribuit.* Vnde pellucet, quare Scæuola dixerit: in illis, quæ recensuit, bonæ fidei iudiciis, *societatem vitæ contineri.* Quo enim modo societatem tuebitur is, qui sibi vindicat aliena, qui datam fidem non seruat, nec præstare vult, quæ mos & consuetudo ciuitatis & notissimi contractuum termini, ac votum utriusque paciscentis suadent præstanta? Pares hic sunt, qui in unum placitum mutuae utilitatis caussa conuenere. Ad utrasque præstationes igitur animum aduertat iudex prudens itemque bonus inter bonos.

§. XLVI.

Sed iam fac ostendas, quomodo arbitratus sit iudex, si unius tantum occurrat obligatio, ut in mutuo, ac denique certa? Arbitrari significat trutinare, conferre, comparare obligationes inter se plures, ac dein ilias exæquare ad iustitiae & æquitatis libellam, ut ex illa

E 3

ma-



matura & plena collatione demum clarum fiat , quid præstare alterum oporteat alteri, nihil licet sit nunc upatum scriptumque. Igitur merito concluditur , in mutuo iudicis quidem, sed arbitrio locum non esse : et si centies clamites, in mutuo hominum indigentiae succurri, actum hic beneficium animaduerti , societati humanæ non inutilem. Neque enim hic mutuarum præstatuum atque incertarum societas est.

§. XLVII,

Par iratione in contractibus innominatis, vbi datur, vt facias, vbi facis, vt faciat, vbi facis, vt detur, ex una duntaxat parte præstatio deest. Adest factum , nec deficit datio. Ergo ab hoc latere nihil superat , quod desiderari possit ; perindeque nunc est , ac si contractus sit vnilateralis, quod & Goeddeus agnouit (*). In vnilaterali vero contractu bona fides, hoc est, comparatio obligationum & inde fluentium præstationum cessat ; eoque nihil adiiciendum restat, nihilque detrahendum ex æquo. Accedit votum contrahentium, vt, dum tu das, alter faciat statim. Sin minus ; adeoque imperfectus est contractus , vel poenitentiæ locus relinquitur , vel conditioni caussa dati caussa non securi , vel etiam actioni doli , vel præscriptis verbis, vel in factum. Quo circa iudex non plus potest, quam est scriptum, aut præscriptum, aut factum faciendumue simpliciter. Nec puto, aliud in permutatione futurum fuisse, nisi Cassius & Sabinus existimassent, permutatione

(*) De Contrah. & committenda stipul. p. 35.



tione veram etiam emptionem & venditionem contrahi (*).

§. XLVIII.

Æstimatorius contractus vero sicuti peculiaris & distinctus non erat; aut saltem dubitatum apud veteres, vtrum talis conuentio esset venditio, an locatio, an denique mandatum; ita dubitationis tollendæ caussa introducta est actio præscriptis verbis æstimatoria, quam eo pacto adornabant agentes, prout negotium ad unum ex illis contractibus accedebat proprius: quod haud obscure monet Edmundus Merillius obseruat. Lib. VIII. Cap. XV. Cuiusmodi obseruationi addas licet, æstimatoriam, quamvis id genus contractus per se consitens esset, hoc est, conceptionem & definitionem haberet propriam, nihilominus mansuram bonæ fidei, quia dubitatum olim, vtrum in caussam emptionis venditionis, an locationis & conductionis incideret? quæ utraque bonæ erat fidei; (***) proflus ac emphyteusis bonæ fidei contractus habetur, vtut Zeno nouam vim ei tribuit; eoque non tam eius naturam immixuit, quam auxit: quod similiter de actione rei uxoriæ animaduertimus supra (***).

§. XLIX.

Quæ cum ita sint, lubet nunc inuestigare effectus differentiæ; quæ est inter actiones strictæ formæ & iudicia

(*) Vid. Vinnius d. §. 28. l. de act.

(**) v. Vinnius l. c. §. 28.

(***) Conf. Donellum ad tit. de act. §. 28.



dicia bona fide discussienda : neque enim ambiguum habemus , quin ex dictis illi dignosci & sine negotio percipi possint.

§. L.

Propterea enim 1) in strictis formis Iudicis potestas ultra petita non protendebatur , quia ius eius , seu facultas certis limitibus erat vallata , isque verba simplicia & directa ante oculos habebat constituta , & factum , puta numerationem reapse praestitam , & ius scriptum , quod certam nonnullis contractibus formam dedit , ita ut nulla cogitatio ultra ; eoque nec pactum adtenderetur , quia in illam formam angustam intrare nihil poterat , ceu de mutuo adfirmauimus hand temere ; idque similiter de stipulatione , si operæ pretium , facile foret ostensu.

§. LI.

Similem ob causam in strictis iudiciis 2) nunquam ex regula iuratur in litem , in liberis autem , quæ non respuunt bonam fidem , iuratur utique . Quod enim l. 5. pr. & §. vii. l. 6. 6 ff. de in litem iurando occurrit , singulare est . Quomodo namque iurabitur in strictis ex affectu , eumque affectum ponderare poterit iudex , qui formulæ est inclusus , seu actioni alligatus , ac , præter verba nuncupata , aut scripta , nihil amplius intelligere cupit , vel expendere debet , ne dicam , arbitrare sollicite ?

§. LII.

Ex eodem fonte 3) manat , quod bonæ fidei iudiciis insit exceptio dolii , caussam dederit hic contractui , an minus ? Neque enim cum clarissimo Nodio , qui libel-



libellum singularem de forma emendandi doli mali conscripsit, distinguo. Saltem actio doli necessaria non est: quod latius ostendit Praeses ad tit. Pandectarum de dolo mali; disiiciens argumenta in Nodtium obuersa. In stricti contra est: non, quod dolus non repugnet stricti iuris contractibus, sed quod iudicis eo loco servum est officium. Quin perperam argumentari omnes & in ambiguis hærere pronuntiamus, qui fidem bonam abundantiorem in bonæ fidei negotiis somniant, quam strictis. Potior Donelli (*) ratio videtur, fidem bonam manere eadem; atque aliunde procedere, quod iudex per se in augustis illis contractibus auxilium dolose circumuentis deneget. Quare a Prætore præsidium expectent, vel excipiendo tempestive & pro tribunali, vel agendo conuenienter.

§. LIII.

Ergo igitur nec reus obstringitur (4) ut exceptiones statim & ante litis contestationem exponat. Sufficit, si id ante rem iudicatam facit, qua probata absoluetur is incunctanter. In strictæ potestatis iudiciis omnia contra se habent. Prætoris enim dextra hic opus est, qui, post acceptum iudicium, suo iuuamine reum amplius vix recreat.

§. LIV.

Simili modō certum est, (5) in bonæ fidei negotiis ob moram in pecunia deberi usuras, tanquam accessiones, in ceteris rebus fructus; cum in strictis actionum figuris eo sese iudicis prouidentia neutiquam porrigat,

F nisi

(*) ad tit. de act. §. 28.



nisi in stipulationem deductæ, aut seorsum illæ solenniterque sint promissæ. Quæ vero usuræ ante litem contestatam nunquam cœpere, illæ nec post contestationem currunt, seu perseverant. In bonæ fidei iudiciis autem & incipiunt a mora, & currunt, nec desinunt post moram. Vigilat ibi iudex ex officio eamque vigilantiam continuat, nec ab illa rationabili sollicitudine desistit vñquam & vsquam.

§. LV.

Ex eadem libera iudicis potestate est, quod (6) in bonæ fidei iudiciis actio tollitur ipso iure, cum e contrario in adstrictis ope exceptionis demum subruatur. Ecce? Et constat, facere in hisce dolum, metum, patrum, iuslurandum, rem iudicatam tum initio, tum postea, ut vanescat obligatio ipso iure, hoc est, iure ciuili; nec opus sit autoritate Prætoris, cuius est, per exceptionem subuenire iis, quibus ius ipsum præsidium negat. Insunt enim in bonæ fidei contractibus & actionibus exceptions; hoc est, ipso iure ciuili insunt: adeoque nec dolum, nec metum, nec aliud quidquam, quod naturæ & vitæ obligationis est contrarium, *admittunt*: siveque absolvitur reus ipso iure, qui non erat obligatus ullo iure. Dices: fieri non posse, ut ipso iure tollatur obligatio & actio, nisi adducatur exceptio. Et recte, regero, & dudum monuit Vinnius, talem allegationem proprie exceptionem non videri, vulgo licet ita appelletur. Vbi vera exceptio, vbi ius est in confessu. In bonæ fidei actibus negatur ius omne perque eam negationem intentio actoris omnimodo repellitur, si allegetur solutio, acceptilatio, nouatio,

me-



metus, dolus, res iudicata. In strictis vero negotiis summum ius obest, quod remouendum prius; antequam securitas obtingat obligato: & hoc vero effici nequit, nisi Prætoris vox intonet, & a rigore iuris libet constrictum debitorem. Idque tempestive immo festinanter peragendum erat pro tribunali, in iure, apud Prætorem, ut sic defenderetur plus æquo pressus: cum e contrario in bonæ fidei iudiciis quævis tempora idonea sint, ante executionem iudicati: quod luculentius probat, reum ipso iure tutum esse. Dubium, quod Doctores & discipulos male habuit, e modis loquendi ortum traxit: **TOLLI IPSO IURE, EXCEPTIO-**
NEM iudiciis liberalibus inesse. Quomodo enim tollatur, inquietant, quod non est? Sed constat, *tollī* idem sonare, ac non nasci. Quod enim illico tollitur propter dolum, nunquam creatur, nec oritur. Quod non oritur, non videtur esse. Itaque ipso iure tolli significat, ipso iure non esse: efficitque nuda allegatio, ut nunquam fuisse obligatio, nunquam vixisse contractus censatur. Quod secus est in ceteris iudiciis, vbi sane nata est actio, genitumque ius, quod, sine novo facto Prætoris & litigantium, ncu iquam vanescit, sed spirat; donec ei anhelitus intercipiatur, aut frangatur gula instrumentis a Prætore petitis.

§. LVI.

Quibus animaduersis haud difficulter percipitur, quod de compensatione ad fert Iustinianus §. 30. I. de actionibus. Ante M. Antoninum Philosophum enim ne quidem exceptio compensationis locum inuenisse videtur in strictis iudiciorum figuris. Etsi enim de hoc

F 2

re-



rescripto D. Marci aliunde nihil innotescit ; id tamen repositum seruatur in Institutionum thesauro. At va-
lide vereor, vt ante Marcum nulla sit tributa vis com-
pensationi : cum compensare sit soluere. Apparet enim
ex l. 4. ff. de compensat. Neratium Priscum qui Traia-
no æqualis erat, existimasse, compensationem ipso iu-
re imminuere actionem, aut impedire , aliis euntibus
contra. Neque mihi dubium hæret, quin plures in-
venerit asseclas hic ICtus , magno honore cultus a Tra-
iano Imperatore. Igitur itum in partes ; donec re-
scriberet M. Antonius , in strictis iudiciis compensationem
ope exceptionis induci debere , eoque pacto
mansit differentia inter bonæ fidei & strictarum actio-
num formulas. At neutquam hic substitere in foro
agentes. Placuit, vt ipso iure exspiraret obligatio, vbi
mutui debiti & crediti contributio obseruaretur ; idque
quodammodo indicat *l. 5. & 6. C. de compensationibus*,
quæ sunt Alexandri. Dolo enim petere non solum vi-
debatur, quod mox esset restituturus ; verum etiam
absurdum prorsus existimabant Consulti quidam, sta-
re, quod est dissolutum , ac compensatione , quæ fit so-
lutio, plane sublatum. Saltem id discriminis aliquan-
diu mansit, vt in strictis ex dispari caussa admitteretur
compensatio, in libris iudicis ex pari ac dispari : quod
adnotatum est a Schultingio ad *Sententias Pauli Lib. II.*
tit. V. n. 3. cui præiuit a Costa ad §. 39. *I. de Act.* Igitur
minime mirum, Iustinianum tandem perspicue decla-
rasse, vt compensatio in omnibus actionibus ipso iure
minueret debitum, dummodo vicissim liquidum foret,
quod debetur. Obseruat Nodius ad rubricam Di-
ge-



gestorum de Compensationibus , ante Iustinianum non fuisse caussam liquidi & illiquidi spectatam , nisi cum proponeretur compensatio aduersus fiscum . Fatendumque , ex lege 6. Alexandri C. de compensationibus id fere pellucere : quod & Wissenbachius animaduertit . Quare quod fisci olim fuit & singulare , inualuit hoc modo vniuersim ,

§. LVII.

Quæ quanquam ad theoriam de actionum bonæ fidei & stricti iuris differentiis sufficere videntur ; non possum tamen omittere hoc loco quæstionem infrunte a multis decisam : an videlicet adiecta stipulatione bonæ fidei contractus efficiatur stricti iuris ; ita , vt emptio , venditio , locatio , conductio naturam illico omittant suam ? & an idem dicendum , si in litteras redigantur contractus consensu constantes ? Ac mirum est , istos se putare sapere ac gloriari interea , plus a se inuentum , quam quod pueri reperiunt in faba , dum adfirmatisse respondent . Potius pueri sunt isti cum adseclis suis in iuridicis rebus ac digni qui farre aqua macerato cum lolio vicitent , ni destruans nidum hirundinimum e quisquiliis & fordibus congestum , aut , si quid boni ex aliorum scriniis est , inde saltem pudibundi seiungant .

§. LVIII.

Quid enim ? Stipulatio , quæ omnium obligacionum erat firmamentum omnibusque accedere contractibus poterat , tam mirificam inducat metamorphosin , vt dum emunt , vendunt , locant , conducunt , ceu solent boni , id amplius non velint , non faciant , quia adiecerent stipulationem ? Scilicet interpretes tali ingenio & iudicio



cio tam obtuso cadere nequeunt, quemadmodum & cur stipulationes interdum pluribus aliis obligationibus accedant? Neque enim hoc partibus est propositum, vt locatio & conductio , emptio & venditio non amplius forent ex contractuum; qui consensu perficiuntur, genere, aut suam naturam & substantiam amitterent; sed vt vnum, aut etiam alterum caput vel fieret firmius, vel constaret clarus. Exempli gratia : in emptione ac venditione s̄æpe apponebatur stipulatio de quantitate pretii & re tradenda, vt sciret vterque euidentius, quid & quantum possit venditore ac emptore, atque emptor vi- cissim exigere a venditore. In ceteris manebat emptio- nis natura, nec bona fides impidebatur. Finge enim, rem fuisse vitiosam , & venditorem, aut emtorem exti- tisse in mōra ; quis credat, sic se ligatum existimasse iu- dicem, nihil vt de reliquis, quæ non adtigit stipulatio, ar- bitraretur. Id verū, stipulationem omnium obliga- tionum firmandarum causa videri inuentam ; non au- tem illico tollendarum. Et tolleretur autem sine mo- ra obligatio bonæ fidei mutua , si tam efficax effectus tribueretur stipulationi subiectæ. Fac porro, solum venditorem de pecunia illico repræsentanda stipula- tione sibi cauisse, an hæc propterea morabitur empto- rem , ne petat , quæ hac in emptione voto & consilio suo est complexus ; nempe, vt sibi officio iudicis ob- tingeret res illæsa cum ceteris præstationibus persona- libus? Qui talibus argutiis indulgent, iurum studiosis spectaculo non solum, sed & sale merito sunt defrican- di. Ea enim ratione alter, qui est emptor, in deterius conditionem suam mutasset, si iudex intra angustos can-



cancellos conclusus in præstationibus cæteris adiudicandis cogeretur obmutescere. Sed statue amplius, emptorem stipulatum sibi ornamenta equi, eaque non tradi a venditore. Nemo ambigit, quin iniuste agat & merito cogatur ex stipulatu ad tradendum. Sed turpiter se daret, qui venditorem porro tantum existimat laturum compendii, nihil ut amplius fide bona circumspiceret ludex, quum de ornamentis pronuntiauit ex stipulatu. Acutius cernunt, qui pluribus actionibus frui emptorem scribunt, actione ex stipulatu ad ornamenta certo & facilius consequenda, manente interea actione empti in qua fides bona nunquam non intercurrit.

§. LIX.

Sed multo ineptius somnium videtur, emptionem ac venditionem similesque conuentiones in litterarum contractus transire, si litteris comprehendantur. Perspicue enim ad vnum omnes cognoscunt, litteras melioris probationis caussa adhiberi: nec, vbi litteræ, ibi illico nasci contractum litterarum, qui stricti iuris habetur, & ex uno latere vinculum iniicit. Vnde extra orbitam est, quod recitat, saltem consideranda videri, quæ litteris sunt expressa. Falsum hoc, & nouus febricitantis & monstrosa parturientis ingenii abortus. Quis enim audiuit unquam, in emptionis ac venditionis contractu, litteris licet consignato & vtriusque manu subscripto, non præstari euictionem, cuius mentionem interea non iniecere scribentes? Mirum, homines ea doctrina copia, omniumque litterarum thesauris & suppellectile nescire, aut non vltro reperire
po-



potuisse, quod omnes tenent. Sed neque vero dubium, quin iurisconsulti cordati risuri albis dentibus sint, aut exhibilaturi tales cornices male collectis atque ad rem nihil facientibus plumis superbientes. Nam quum deprehenderent, fieri aliquando, ut, quod debetur ex empto, transfundatur in stipulationem, vel litterarum contractum; illico animum induxere, id igitur omnem adiectam stipulationem, aut scripturam efficere, tota ut emptionis ac venditionis natura cum libera Iudicis facultate in fumum abeat extemplo, & stricta oriatur iuris forma, quae paullo ante fuit laxior nullisque vinculis impedita. Adeo igitur lyncei sunt, nec nisi sincerum spirant, pactum non pactum, emptionem non emptionem, ac stipulationem iterum emptionem, hanc chirographum dicentes. Sed haec iurisprudentia haud dubie in Vtopia est recepta, vel ad Caucasii radices enata, vbitam solennes ampullantur nugas Tartarici iurisconsulti. Rectius Vulteius iurium peritus de meliori luto loco supra adducto: *Vt autem actio aliqua, quae est bonæ fidei, fiat stricti iuris, nullus est casus. Sane nouari potest obligatio, ut quod ex contractu bonæ fidei debetur, id postea debeatur ex contractu stricti iuris. At tunc obligatio ALIA est, non EADEM priori illa sublata; & ex consequenti actione agitur stricta, non actione bonæ fidei, quae in actionem stricti iuris transferit.*

§. LX.

Igitur damus, si tota res in stipulationem animo nouandi est traducta, solam actionem ex stipulatu locum tuituram. At animus nouandi sicuti in dubio non presumitur; ita absolum prorsus, bonæ fidei actionem.



act ionem coire in aliam , quæ est strictæ formæ , & transmutari contestim ceu Deucalionis & Pyrrhæ post terga reiectos lapides. Id vero propterea dissentientibus permittimus , quia *l. 71. ff. pro socio* quodammodo patrocinari illis videtur , in qua Alphenus , referente Paulo , respondet , stipulatio , post coalitam societatem , ita concepta sit , *hæc ita dari, fieri spondes, pro socio* agi non posse , si aliquid contra factum sit : quamquam alia suppetit caussa , quamobrem ex stipulatu actionem concederit laudatus Alphenus . Nec enim actio pro socio ad dissoluendum contractum datur . Et hoc loco iudicium communi diuidendo cessasse videtur , quia nihil dum in arcam communem erat illatum ; socio interea ægre ferente , quod alter ab amicitia lege resiliuerit statim post confessam muto consensu societatem . Sed hæc vtcunque sint , largior iterum , transfusa in stipulationem societate Alpheni definitionem se habere recte . Verum quid ? si animus nouandi desit ? quid ? si ex certo capite stipulatio interposita ? Ac bardus sit , qui hic mixturam vtriusque actionis admittat . Prima enim in specie , si quidem in continenti stipulatio adiecta , vnus tantum manebit contractus , nec vlla aderit nouatio . Stipulatio enim prohibet , ne actio ex contractu emptionis antecedente nascatur . Quocirca perinde erit , ac si de emptione contrahenda nunquam fuisse actum , sed sola stipulatio placuisse : quod colligitur quatantenus ex *l. 6. §. 2. ff. de Novationibus ac delegationibus* . In altero themate vero , vbi certum caput contractus in continenti in stipulationem deductum , vel vinculum vinculo addi-

G

tur ,



tur, vel stipulatio adhibita fines suos non egreditur. Fac igitur, me *vacuum possessionem tradi* stipulari a venditore, vel rem dari, dubium non est, quin actio ex stipulatu competit: sed neutquam venient fructus a die stipulationis, ut quos in illa non comprehendendi. Itaque ex empto agere licebit ad istos consequendos: in quam tanquam actionem bonæ fidei multa intrant ex æquo & bono, vtut non expressa: idque est quod *I.* insinuat *z. §. 1. ff. de aet. empti* illis verbis: *Sed ex empto superesse ad fructuum præstationem.* ET SENSUS est, inquit Dominicus Alisius (*) ICtus Neapolitanus longe doctissimus, *eum, qui ex stipulatu egit ad vacuum possessionem tradendam, consequi rem, non autem fructus, quia in stipulatione non sunt expressi;* nec tamen fructus amittere, quos consequetur altera actione exemptio. Ex quibus omnibus patet, nihil hic misceri, aut confundi in vnum grumulum, sed proprias vires retineretur contractum priorem, tum adiectam stipulatioem, quod iam dum Alciatus in *parergis suis* deprehendit: eoque miserum Iurisprudentiæ fatum est, vt, quod in iam primi humaniores interpretes intellexerunt, multi nunc ne capiant quidem, inque his vecors Doctorum turba, qui nil nisi Bartolum crepant, cuius sub interpretamento-rum clitelis sudare ius nostrum cupiunt. Bartolus vero hac in caussa haud parum turpiter se dedit, ac mentum suum tam vehementer ad laxum stultitiae allisit, vt ne eos quidem errores effugerit, quos effugient alioquin tirones: castigatus propterea a Pichardo defæcato-

(*) De Verbor. obligat. cap. III. p. 165.



tioris ingenii Hispana in comment. ad Inst. *quibus modis collitur obligat.* Supra vero laudatus Dominicus Alisius rem omnem præclare animo est complexus, scriptor perspicuus & lectionis multæ, ac iudicio præditus nequaquam mediocri.

§. LXI.

Ceterum paullo tolerabiores sunt, qui cum Cuiacio contractus stricti iuris fieri bonæ fidei per oppositam explicationem, vel replicationem doli mali causantur. Quamquam enim & hoc a vero abludit, tam immite tamen non est, tam immoderatum & male sanum, quam antecedens pabulum ex pluribus satis congestum commixtumque: quando bonam fidem in strictum ius transfigurare, aut rudem ei ac sylvestrem habitum circumdare fategeret. Cuiacius vero cumque eo plures mitigare e contrario illud ius seuerum contendunt; ac Dorotheum Græcum sequuntur, sed quam iam suo tempore depexum dedit Stephanus ni fallor, aut alias Græcus interpres. Cuiacium Lib. III. obs. 17. l. Sein 42. ff. de mort. causa donat. in errore confirmavit: qui interea in Virorum doctissimorum reprehensionem incurrit, ac Goeddeo cum maxime & Antonio Fabro poenas dedit. Putarunt enim, hac ratione omnia in iure Romano confundi, perindeque futurum, bonæ fidei contractus dicatur, an stricti iuris? præsertim cum ex accidenti veniret, iudicium fieri strictum, vel contra. Quin caderent prorsus a iurisconsultis & speciatim ab Vlpiano prodita, qui actiones, in quibus exceptio doli inest, distinxit ab alteris, in quibus non inest. Id extra dubitationem collocatur, non destitui-

G 2

clau-



clausulam : *dolum malum abfuturum* suo effectu, quæ in fauorem rei est adiecta. Excluditur enim actio & condemnatio, aut minuitur per oppositam exceptionem: non autem mutatur forma actionis, vel formæ qualitas: ut taceam, semper agi condicione certi, vel ex stipulatu, quæ actiones non possunt non esse strictæ. Nec prætereundum, omni tempore atque in ipsa executione in bonæ fidei iudiciis exceptionem doli obiici recte? cum vicissim in adstrictis illa sit opponenda tempestive inque iure; istaque omissa iudex nunquam fiat arbiter. Adde, ipsam de dolo malo actionem a nemine nuncupari bonæ fideli: quod si esset, condemnari & reus posset in plus, minusve pro re nata. Cuiusmodi commentum nunquam in mentem venit veteris iuris conditoribus. Quare consequitur, ut Cuiacius bonæ fidei & strictarum actionum naturam minus sedulo perpenderit, multaque turbauerit. Facit enim in actionem bonæ fidei ex rei vindicatione, cui exceptio doli non inest: cum ceteroquin in bonæ fidei negotiis exceptio ipso iure insit, & latius eat verseturque, quam clausula: *dolum malum abfuturum* indeque opposita exceptio, quæ cancellos suos non transilit; & actori tantum nocet, non reo. Quando autem iudex officio suo fretus iudicat ex æquitate, non solum ille dolum remouet, sed quidquid inæquale est, resecat, & ad æqualitatem reducit. Quod ut cernas coram, singe; Spopondit Titio Caius, tradi domum vacuam & Caius vicissim est stipulatus, vt repensentur sibi mercedes habitantium sine dolo malo. Agit Titius: opponitur ei exceptio a Caio. Verum est, facere



cere exceptionem, ne actio locum habeat, nisi pensaverit mercedes Titius: atque haec est illa notissima vis, ut exceptio elidat actionem, aut saltem infirmet. Iam statue, mercedes esse repensas, aut cautionem interpositam, vel fidei ius flores acceptos. Iudex quid? condemnabit is, credo nunc Caium ut fundum vacuum sistat. Quomodo? ex bona fide? respiciendo ad id, quod interest, Titii domum non esse vacuefactam? aut quodammodo tradi labefactatam? Et nemo hoc dixerit. Potius olfacere potuisset Cuiacius cum iis, qui eum cœco impetu sequuntur, neutquam hic occurrere actionem bona fidei proprietalem, cum ad utrumque latus se vix porrigat iudicis potestas, sed inclusa maneat formulæ. Non is audiet Titium multa de mercibus a Caio interea perceptis garrientem, de damno emergente & lucro sibi intercepto. Habeas, inquiet, domum, quæ ex sponsu tradi debet, vacuam, amplius & maius nil habeat. In stipulatione expressum nihil est. Remotus est dolus. Qualis actio tua fuit ante exceptionem tibi obductam, talis est nunc quoque, postquam obducta, & satisfactum Caio.

§. LXII.

In lege Seia 42. ff. de mortis caussa donationi. aliud occurrit thema, quam Cuiacius comminiscitur. Donauit enim Seia mortis caussa omnia sua bona Titio cognato & tradidit, retento sibi usufructu, eo pacto adiecit, ut si Titius præmoreretur, proprietas ad se reverteret, donec ipso quoque exspiraret, & tunc bona sua transirent ad liberos Titii. Obit hic ante Seiam: vindicant filii Titii res singulas; itaque dolum obiicit Seia,

G 3

ia,



ia, quia donationis conditio nondum defecerat. Ha-
c tenus bene. Nam infert Cuiacius ex verbis sequenti-
bus: *Bona fidei autem iudicio constitutio per exceptionem*
doli oppositam rei vindicatione in bonae fidei esse effe-
cetam: quod est propterea absurdum, quia exceptio a Se-
ia obuersa profuisse Titii filiis ad *hesitationem*, aut quæ-
stionem fundandam: an Seia cauere illis de futura hæ-
reditate obstringeretur? in bonae fidei iudiciis namque
non immerito securitas postulatur in futurum. Ne di-
cam, Prætorem constituere iudicium data formula, & ad-
dicendo iudicem: non autem legi vsquam, exceptione
constitui. Ergo nouum circumspexere thema pru-
dentes, quod iam suppeditauerat glossa, existimans, bo-
nae fidei illud iudicium esse hæreditatis petitionem;
adeoque Papinianum non *subiunctive*, sed *adversariue*
videri capiendum, hoc videlicet pacto: si autem filii Ti-
tii hæreditatis petitionem, instituisset, tum subnatu-
ram quæstionem: num Seia cauere iis in futurum debe-
ret de accipienda hæritate? quam cautionem Papi-
nianus iis denegat. Neque enim ad cautionem de re-
stituenda hæreditate obligatur quisquam. nisi cum dies
cessit, ita ut hæritas sit. Dies vero non cessit, estque
in pacto, reuersuras res donatas Titio, eo præmortuo, ad
Seiam. Hæc domina est, Nihil adhuc debet Titii filiis
nec incipit debere. Exspectent igitur, donec & ipsa
ultimo vitæ lineam absolverit. Atque hoc illud diffi-
cile est thema, in quo res tota eō redit, quid significet
locutio: *bonae fidei vero iudicio C O N S T I T U T O*. Cuiacius
vocabulam *constitutum* sibi credit patrocinari adeoq; glos-
sam spernit exponentem de iudicio hæreditatis *I N S T I-*
T V;



TVTO. Cuius generis effugium non est satis criticum. Vbi constitutio ibi simul institutio. *Constituere actionem alicuius rei* Ciceronis est in *Orat. pro A. Cæcinnac. 14.* Quibus bene perpensis non habeo, quod addam, aut quod imperitissimis amplius hominibus ac nugiundulis commendem, quam tradita a Goeddeo de *contrahend. & committ. stipul. p. 847 seq.* itemque A. Fabro *Coniect. Lib. XIV. cap. 18. & 19.* reliqua ex pelui fulgura egregie dispellentia.

CAPVT II.

VSVS PRACTICVS ACTIO- NVM BONÆ FIDEI ET STRICTI IVRIS NVLLVS.

§. I.

NEc vtemur vero eorum argumentis, qui hoc actionum discrimen propterea autumant sublatum, quod solennes cessant formulæ, earumque solennes impetrations. Id enim si foret, iam ante Justinianum omnis illa differentia evanisset certe: quod interea veritati aduersatur, cum repetierit Imperator hanc diuisionem & confirmauerit, ac de suo adiecerit nonnulla, iubendo, definiendo, transfundendo, extendendo. Potius, aiunt, in hoc omnis vis, ex Justiniani mente latitat, vt iudex non sit adeo exacte adstrictus ad formam libelli, & quantitatem petitam, iudicetque ex æquo & bono in iudiciis æquo ac bonæ fidei. In strictis contra inhæretis summæ petitæ,



titæ, oculosque suos in forma libelli defigit, qui ex singularum negotiorum & actionum medulla conficitur. De quo dein disputabimus copiosius.

§. II.

Similiter e iure Canonico nihil petemus præsidii, vtut Baldus & Iason iniecere scrupulum, quibus recentiores concinuant, ipseque Stryckius olim nostras. Sed sicuti Iason rursus a Baldo recessit, nec coniiciendum facile, vtriusque iuris symphoniam fuisse sublatam, nisi vbi clara rerum testimonia adsunt, ita cum hoc loco illa deficiant, & argumenta potius in contrarium suppetant, merito subsistimus, & de abrogatione bonæ fidei & stricti iuris contractuum, qui cauſſæ sunt actionum eodem nomine venientium, haud temere dubitamus. Aiunt quidem: Canonum iura naturam imitari; naturale autem ius nullas agnoscere inter contractus differentias, vt quæ prodiissent potius e fonte iuris ciuilis. Quod postremum eti⁹ neutquam nego, idque dein limpidius sum ostensurus; non est tamen veritati penitus conueniens, canonica decreta sic premere rationis vestigia, nihil vt cum stricto iure Quiritium ei commercii intercedat. Ac magis est, vt, quæ tradit ius Romanum; ſepiſſime & quum existiment Pontifices; rariſſimeque ab eo recedant. Quod inde fatiſ pellucet; quod, quamdiu probatum non est, eos nudis pactis vim obligandi tribuisse, vix etiam veriſimile fiat, illam nobilem contractuum differentiam, quæ ſeſe per totum ius Quiritium expandit, radicitus fuisse a nouis Flaminibus Romanis euulsam. At quam falſum id sit; eruditissimi & veterimi quoque iuriſconſul-



sulti probatum iuerunt; cumque maxime Ianus a Costa *X. de Pastis p. 223.* vbi ea simul argumenta offendes contrita, quæ de discrimine contractuum bonæ fidei & stricti iuris extinto in medium ab aliis adducuntur. Certius videtur, ipsum ius Pontificium fere corroborare sæpe nominatam differentiam *in c. 3. X. de caus. possess. & propr.* quod est Innocentii III. vbi nominatim in iudicium non deducta non etiam considerari stricteque respici ad petita pronuntiat. Erat enim hæsitatio, an ecclesiæ conuentuales ciuitatis Sutrinæ habarent ius eligendi Episcopum cum ecclesia cathedrali? Et proponebatur ab illis, conuentuales in possessione fuisse, de iure vero perspicue innuebant nihil. Unde putabat Pontifex, tam in petitorio, quam possessorio merito pro cathedra eiusque Canonicis decidi: cetera impune negligi, cum nominatim ius suum, vnde cunque etiam fluxerit, in iudicium non traduxerint contra euntes ecclesiæ conuentuales, eoque verba Vlpiani, quæ *in l. 60. ff. de iudiciis* leguntur, valere iussit; in primis cum breuitas temporis impeditret, ne prescriptionis beneficium iis prodesset. Non est nostrum, examinare hoc loco, an decisio Innocentii sit referenda inter iustissimas? Sat est, constare hinc, Pontificem ius strictum ante oculos habuisse constitutum: quamuis ex æquo & bono potuisset actoribus melioris probationis imponere onus.

§. III.

Quibus aliisque argumentis expensis, Wesenbe-
cius, & Gœddeus cum Mynsingero, Zasio, & Anto-

H

nio



nio Fabro (*) ridendos propinarunt Baldi ad seclas : in que primis postremus I^Ctum pragmaticum Gallum *Imbertum* paullo acerbius reprehendit , quod iudicia stricti iuris christianæ repugnare religioni in *Enchiridio* suo scripsisset ; ignoscendo Theologis errore , non autem iurisconsulto , qui in Romanorum scitis & iuris arte meliori ratione præsumitur instructus rectioraque edocetus . In quo eti Fabro ceterisque accedendum censeo , qui Amesium Theologum Reformatum in iurisconsultos detonantem pari ratione in viam reduxere ; valde tamen iidem falluntur nouoque & contrario errore in Scyllam incident , quando illam distinctionem ex iuris naturalis fonte ita manare contendunt , ut ne tolli istam vlo posse iure existiment , adeoque vel totam iurisprudentiam sic peruersti , vel differentiam , quæ olim fuit , inter iudicia bonæ fidei & stricti iuris , adhuc superesset .

§. IV.

Ego contra . Sed evidentioribus signis ac rationibus est vtendum . Et in oculos incurrit præsumpta opinionis infirmissimum fulcrum , quod dissentientes obstringillandi & confutandi studio non animaduerte re , eoque par in ceteris iudicandi felicitas neutiquam iis obtigit . Longe enim diuersa sunt , aliquid non aduersari naturæ legi , ac tanquam arbitrarium variis ex causis tolerari ; atque id statim iuris videri necessarii & vniuersalis , a quo nemo gentium sese bona fide auerat . At minime dubium habuere habentque adhuc

Iu-

(*) De erroribus Pragmat. decad. IX. err. I.



Iurisconsulti complures, illam contractuum Romanorum structuram non solum iuris gentium esse, hincque de illorum ortu mira commemorant; verum etiam naturam negotiorum non ferre, ut aliter ordinentur conuentionum figuræ, eoque conditionem naturæ hic occurrere; prorsus ac si omnibus communiter natura dixisset, bonæ fidei & stricti iuris contractus ab æterno iure proficiisci. Adeo isti aguntur præcipites ac se se involuunt, ut ius quoque ciuile perturbent.

§. V.

Merum enim commentum Quiritium sapit tota, de qua disputamus, differentia. Quod enim impedit, quo minus Magistratus vndique sectetur æquum, & suppleat, quæ sunt omissa a contrahentibus, detrahatur, quæ sunt præter ius & morem admissa? Enim uero quum apud Romanos pacta nullius fere roboris essent, atque in stipulationibus verborum rigor inualeceret, in que litteris quoque variae tendiculae & aucupia in mores irreperent, arbitriis, quorum inuidiosa erat ob Regum tyrannidem memoria, spretis; simulatque Magistratus πέσωπον a iudicis facie vultuque differret; hicque, post constitutum stata cærimonia iudicium, sui amplius iuris non esset, quam pateretur ius in fori tritura receptum; quid mirum, non potuisse Romanos longo tempore ab illa rudi & agresti legum severitate, sine publicæ quietis dispendio, se se auertere? Qui adhuc ambigit, is Romanorum rem iudicariam strictamque legum seruandarum rationem nunquam solide & cum cura est contemplatus, quæ non ferebat, quemquam de iure ciuili directo aliquid mutare, ne quidem

H 2

Præ-



Prætorem, multo minus Iurisconsultum. Quin adeo odiosum erat in iure nostro, nouum ius facere, vt istud haberetur pro iniquo, eiusque repertor pro homine callido & nouarum rerum cupidissimo. Quæ res fecit, vt ne Principes quidem a veteri iure facile recesserent, sed, cum fieret, evidentem utilitatem prætererent; prorsus atque Prætores coloribus ac fictionibus vñi sunt & Iurisconsulti ad alia demum remedia animum cœperunt conuertere. Neque enim XII. Tabulæ aliud, quam obseruanda dictabant; earumque maiestas ac concinnitas neutiquam patiebatur, vt ad suasiones & præcepta deflexerent: præterquam quod hæc etiam a natura legis aliena erant; erudite id obseruante Henrico Brenkmanno^(*). Quare ICti veluti boni & sapientes viri ad ratiocinia confugientes omnia ad honestatem societatemque referenda statuebant. Et supra vero monuimus, societatem eiusque bonam causam ac fundamentum primarium fuisse, quare numerus contractuum & actionum bonæ fidei cresceret; & strictæ conuentionum formæ atque inde fluentes actiones imminuerentur: cum antea vincerent reliqua numero, aut potius solæ essent, priusquam disputando, adnotando, differendo, docendo, orando, edicendo ab illo rigore populus paullatim ad mitigatione steretur; & ICti denique vniuersusque contratus & naturam fixam efficerent certamque.

§. VI.

Ac non est dissitendum, veteres ICtos, vt ut necesse sita-

(*) Diatrib. de Eurematicis Modestini cap. I. n. 12. 13. sq.

sitate temporum ciuiliumque rerum motu fere coactos, subtili s̄epe animo rationes in finienda conuentionum natura subduxisse. Nec enim aliam subesse caussam puto, quare mutuum tam angustis limitibus sit circumscriptum, quam plebis in diuites v̄suris capiundis deditos ferale odium, quæ interea inops ac plurium rerum fungibilium erat indigens; nec semper soluendo, eoque haud raro moram trahens, donec dissolueret contracta nomina. Idcirco gratuita mutui natura emerit; nec ratio habita moræ: nisi quidem stipulatio ne sibi sigillatim prospicerent contrahentes, simulque diem signarent, quo reddenda esset credita pecunia: idque temporis progressu in v̄sum demum venisse videtur. Ex quo vero haud difficulter percipitur, nullum eius rei in naturali iure vestigium inueniri, et si ICti Romani hanc mutuo naturam adfixerint, ex ratione temporum ac status popularem inter & Aristocraticum fluctuantis. Cuiusmodi caussæ atque alia evenientia nisi intercurrissent, nulla ratio cogere Themidis sacerdotes videbatur, vt ne pro v̄su pecuniæ suæ vel stipulari permetterent in antecessum aliquid compendii, aut mora interueniente soluendum statuerent plus, quam est datum acceptumque.

§. VII.

Ex quo confit, mutuum accepisse suam propriam naturam apud Quirites; quæ interea alias gentes nec stringat, nec ex rationis dictaminibus solide probetur, ceu optime demonstrat Hugo Grotius (*). Nec quis-

H 3

quam,

(*) In Commentar. ad Lucam cap. VI. v 35.



quam, credo, statuit vñquam, stipulationum inuen-tum eius esse necessitatis, iurisprudentia vt corruat, si tollatur de medio, aut saltē pactis nudis similis effi-cientia atque robur tribuatur. Immo aliunde inno-tescit, ortum ceterarum diuisionum omnium, in quas abeunt contractus Romani; inde potissimum deriuari, quod solus stipulationum nexus initio Quiritibus pla-cheret; a quo rigore pedetentim iterum abscedentes reales tandem, litterales, consensuales, verbales, ve-ros, quasi, nominatos innominatosque contractus fa-bricarunt; aliqua simul corroborantes pacta: cetera vero, quæ non essent illicita, prætoria auctoritate tue-nentes, ne videlicet sic paciscentes omni exceptionum sola-tio destituerentur.

§. VIII.

Quibus auxiliis & commentis neutiquam opus fui-set, si tantumdem semper valuissent pacta, quantum sti-pulationes & litteræ; inque sumum certo abiissent re-censitæ contractuum species omnes, vnaque obligatio mansisset diuersis duntaxat modis & comparationibus varianda. Aliud enim propositum habemus cum com-modamus, aliud cum mutuum inimus, cum vendimus & locamus, in societatem descendimus, mandamus, transfigimus, reliqua: quæ proposita certis dein nomi-nibus signantur signataque retinentur, quæ demum ex-ponimus in scholis & secundum harum comparatio-num ac visionum differentias ambigua in iure themata resoluimus.

§. IX.

Ac posse[n]ius, si res posceret, per singulas ambu-lare



lare species, aut saltem contractuum genera, nisi viri docti, inque primis Grotius, Puffendorfius & illustris Thomasius noster aliquie, qui huius legunt vestigia, rem totam in claritate constituisserent. Quorum luminibus ac beneficio id certe consecuti sumus, ut Ius Romanum hac parte nemo sapiens, aut vir cordatus pro gentium iure amplius amplectatur, eamque machinam ARTE singulari constantem & per spiramenta temporum expositam pro NATVRÆ opificio habeat; sed potius Quiritium mancipio & nexus propriam agnoscat.

§. X.

Iam vero ubi de practico vsu actionum bonæ fidei & stricti iuris differendum, per se liquet, non de vsu Romano verba fieri, sed qui ille sit in Germanorum iudiciis ac patrio foro. Et maiori autem auctoritate Magistratus nostri pollent, quam iudices pedanei: similis pactorum ac stipulationum vis est: non eadem, quæ Romanis de mutuo opinio, nobis sedet. Quæ vero æquitas iubet siue initio, siue ex post facto emergens, omnes circumspiciunt; neque hoc solius Prætoris munus est, aut noui Legiflatoris, aut iudicis in certis tantum negotiis tam laxa potestate armati. Nemo illis coloribus indiget, quibus iuris Romani artifices sunt vni, dum populum a rudi feueritate abducere sunt moliti: potius Teutones hac parte libertate vtuntur, atque ad naturæ dictamina proprius accedunt. Quod inde apparitum certius confido, sicubi pensaretur, exsibilatum iria Principibus fori tintinnabula, quæ in exponendis, aut dijudicandis eorum contractibus & fœderi-



deribus præsidium vel a bona fide , vel stricto iure petendum existimarent. Magis enim est , vt bona fide; hoc est, plene eorum pacta, fœdera , & petita , si iure agatur, librentur; nec attendatur, de mutuis præstationibus principio cogitauerint , an ex interuallo demum aliquid prodierit, quod sit pensandum, ex æquandum, tollendum, adiiciendum ex bono & æquo, sifice re, atque ex animi sententia. Id autem si est , eo magis sane claret, totam illam differentiam ad ciuile ius Quiritium pertinere illamque ius naturæ ac gentium ignorare; probandumque omnino , eas contractuum diuisiones artificiales a Germanis esse receptas.

§. XI.

Quemadmodum vero ea, quæ iam de pactorum firmitate in medium tulimus , satis euincunt non potuisse diuisiones istas arridere ciuibus nostris ; ac multo minus bonæ fidei & strictarum actionum discrimen, utpote quod ex causis singularibus pluribus ortum duxit ; ita cum illæ omnes apud Teutones deficiant , & cum maxime Magistratus nostri sine schematibus , ac commentis & fabulis Romanorum antiquis libere causas definiant, & tum de iure, tum etiam de facto pronuntient, palam fit, somniare omnes , qui in foris nostris de illa differentia in vsu versante multa inaniter effundunt.

§. XII.

Cui vix obest, Iustinianum illa bonæ fidei & stricti juris iudicia stabiliuisse , et si iudicum pedaneorum nomen munusque iam tum euanuit. Controversia quippe est , an Germanorum natio aliquid de illa differen-



ferentia rescuerit vñquam? Iustinianus autem eam in foro tempore suo inque ICtorum veterum volumini- bus & constitutionibus Principum Antecessorum reperit, numerumque bona fidei actionum auxit, eas- que, ceu credebat, poliuit. De quo nostri iterum ni- hil percepere vsquam, vtpote iuris Romani & Iustinia- nei prorsus ignari. Neque mihi dubium hæret, quin, sitam magnifica e Q. Mutii philosophia maiores no- stri audiuisserint, illi vel obriguissent, vel quæfuturi tan- dem fuissent: quare igitur in hisce tantum, quæ socie- tatem promouent, negotiis bona fides versari debeat, in ceteris non item, quibus tamen societas humana ca- rere itidem nequeat? Eccur intercurrere dolus in stri- ctis possit, in reliquis minus? An vna perfidia sit ma- gis perfidia? quam altera? aut an aliquando perfidia non sit perfidia? Teutones fide omnes mortales ante- cedere: hoc ipso confiteri Romanos; adeoque in- eptum sibi prorsus videri, doli actionem, aut exceptio- nem excogitare, vbi breuiori liceret opera defun- gi. Quirites in circulum ire, ac dolum non impedire, sed vulnerata demum caussa remedium quærere. Quin nihil parere stultius, quam duplex statuere ius, ciuile vnum, Prætorium alterum: simulatque adfirmare, istud ad certas tantum caussas sese porrigere, & auer- runcare in quibusdam dolum, atque obligationis vin- culum penitus tollere, in aliis relinquere, donec Præ- toris vel magistratus vox interueniat æquitate com- moti, qui pessum det & rescindat illas stricti iuris ca- tenas, atque ad statum ac simplicitatem rationis omnia iterum redigat. Suos iudices magistratus munere si- mul



multungi, & de iure respondere , ac iudicare & arbitrari pro re nata. Suam iurisprudentiam vndique artem æqui bonique esse ; atque absolum merito haberi, auferre demum per exceptionem, quod tutius non admitteretur ; turpiusque sic eiici iniquitatem , quæ si nunquam fuisse hospitio excepta , nunquam sane debuisset expelli. Ab omni autem iustitia alienum merito censeri, promittere solenni stipulatione , ac dein in mora versari , illamque abire nihilominus impune ; item , pecunia, aut re aliena fungibili vti abutique, & lucrum Gaio intercipere ; ac ne terentium de cetero in pensionem damni eiusque , quod interest, illi tribuere. Ac parum iuuari Romuli nepotes de ignauia contrahentium expostulantes. Facile enim vsu venire, vt quis non nihil negligat, & omittat, aut eius obliuiscatur , quod vtiliter adiecisset, adeoque conditionis humanæ transcendere infirmitatem , vt is, qui scriptis aut nuncupatis contrahere verbis cupit, nullius rei memoriam amittat, feratque propterea in re familia ri obliuionis poenam , quæ sæpe euitari nequeat. Neque enim peritos rerum pacisci, ac stipulari semper plures in ignoratione iuris tam ingeniosi versari , cum quibus tam seuere neutquam sit agendum , vt idcirco excidere formula omnique compendio debeant. Idque ipsos tandem Prætores perspexisse, multa remedia inuenientes paullatim , & stricto iuri intercipientes spiritum ; nec ignorari eurematica, quibus excogitandis ipsi Iurisconsulti dedissent operam : otiaturi interea omnes , si germana illis simplicitas arrisisset initio, nec tot turbis & Demagogis agitati Quirites per varios an-

fra-



fractus & circuitus eniti tandem ad aliquam iuris artem
habuissent necesse , quales turbæ Teutonicis populis
essent ignotæ , eoque clariorem philosophiam , & bre-
uiorem iuris artem ; ac pauciora etiam instituta olim
moresque rectiores iis obtigisse , qui fecissent , ne tot le-
gum reticulis , circulis ac vinculis indigerent.

§. XIII.

Quibus bene exploratis rogo te Lector , vt nunc
demum deliberes & in te paullulum descendens sollici-
te perquiras , an sit verisimile , vno halitu conuersos fuisse
Germanos , cum serperet ius Romanum , inque tribu-
nalia nostra furtim irreperet , dein vero maiori impetu
sese infundere inciperet ? Et non putem , sic quem fu-
turm lapideum , atque inscium historiæ penitus , vt la-
teret illum , quam difficulter & Diis hominibusque inui-
tis admissum deum sit ius peregrinum , nitentibus in
contrarium moribus antiquis , quibus per tot sæcula res
Teutonica , maiorique felicitatis cumulo stetit bea-
ta . Est hoc tum a nobis alibi , tum etiam a viris doctis
in historia iuris obseruatum , plura maiorum nostrorum
instituta ex illo incendio euallisfe paucioraque e Romano-
rum scena in nostram traducta orchestrā . Adeo
diuersa erant exotica & nostris dissimilia moribus , vt
aptari & iungi , vt surrogari & subire in locum veterum
legum & morum prorsus nequierint . In quibus
& illa differentia actionum bonæ fidei strictique iuris
fuit , quam ipsi non capiebant Glossarum confectores , a
quibus ceteroquin Teutonici adolescentes Romano-
rum hausere iura , multa trahentes sordida , impura , falsa
& puerilibus crepundiis consentanea : æquitate interim



in tribunalibus imperii aliisque iudiciis triumphante ; ita ut ad summum subsidiarius iuris exotici vñus fieret, & tum demum Delphos consultum irent Iudices & Magistratus, vbi nostra filerent statuta, & ope consilioque destitutos in ancipiti relinquenter. Quod quanquam doloris plenum est ; cum alioquin ratio in consilium adhibetur in caassis perplexis ; tamen ferendum hoc foret vt cunque : modo teneatur, a fallo proxime abesse, tricas illas de bonæ fidei ac stricti iuris negotiis in forum ac curias esse receptas, de quibus interea inter se digladiantur Doctores in scholis, quænam sint illæ ? quot demum ? quæ singulorum notæ , ac γνωστοματα , qui effectus ? illis hæc, aliis ista tradentibus, & infarcientibus atque iterum rescindentibus: adeo vniuersa atque singula sunt conturbata, confuse & permiste dispersa, vt indecori prorsus videantur, ne dum stulti, qui hoc loco ius Romanum nobis obtrudunt, ac, ni parcatur, de tota iurisprudentia actum & conclamatum quiritant ; cum tamen vix centesimus lamentantium intelligat, quid indicauerit illa formula : **FIDE BONA.**

§. XIV.

Itaque ad se rediere nonnulli ac quasi expergefacti somno statuerunt, illam differentiam per imperii constitutiones, quas vocamus recessus, esse iterum abrogatam. In quo id cubat inconcinni, Teutones ius Romanum vel habuisse, vel accepisse; eiusque iniquitate cognita rursum expulisse foro. Sed ita vero nudum latus aduersariis suis hi præbuere Doctores ; in primis cum ob moram ex mutuo vñuras soluendas probarent ex Recessu Deput. a. 1600. ac recentissimo a. 1654.

IV-



IVRA enim inquiunt nunc basiatores differentiæ dilatatae, correctoria strictissime & prout littera iacet, accipienda veniunt, ut minus quam fieri possit, ius anterius lœdant. Vnde statutum corrigens Ius commune in expresso non censetur corrigeri in casu non expresso, sed is remanet in *DISPOSITIONE IVRIS COMMVNIS ANTIQVI*, vt, in pluribus autoritatibus conualentia Alderan. Mascard. in commun. conclus. de gener. statut. concl. 4. n. 50. 51. & 57. communem eam conclusionem dicens, maxime quando in casu omisso nulla est necessaria cohærentia cum expresso, aut in utroque casu quæ prætenditur rationis similitudo non est adæquata. Nemo non intelligit, quam præcipiti consilio Iurisperiti, recte licet de non vnu actionum bonæ fidei & stricti iuris sentientes, ad constitutiones imperii configurerint. Illoco enim accipiunt vtiliter Doctores pragmaticis erroribus scatentes, ingeminantque, usum igitur antecedenti sæculo XVI. in confessio versari; si quidem sæculo XVII. euenerit mutatio. Mutationem vero nec præsumi, nec, si quid mutatum, ultra cogitata Legislatorum fore dilatanda verba. De usuris ex mutuo ob moram Iudicis officio actori attribuendis sermonem fuisse: hanc questionem esse decisam. Sed nimis liberales vero merito censi, qui & reliquos, quos lex imperii non adtingit, contractus adstrictos in eundem alueum transferant & ex minima mutatione conficiant maximam: quem in finem brocardicorum imbre chartas suas madefaciunt, austorumque nubem cogentes horribilem tempestatem minantur. Verum tamen lauent parietes ac perpluant



tigna, effluat e vertice montis torrens, nec fundamen-
ta tamen conuellentur.

§. XV

Tudic, auctores in Recessibus imperii præsidium quærentes bonam caussam defendisse sat male : hinc tot lapidibus vrgentur totque telis impetuntur. Illi vero extra iactum sunt positi, qui nunquam Germanos tam artificiosæ iurisprudentiæ nauasse operam trandunt; nec aliquid hac de re resciuisse prius contendunt, quam cum rauca Italicorum & barbarorum magistrorum vox Germanos infatuaret, & quædam Romanæ iurisprudentiæ fragmina iis quam commendatissima reddere, confuso licet murmure, laboraret. Neque enim credibile est, illos glossarum propolas in arcanam actionum bonæ fidei & strictæ formæ doctrinam penetrasse vnquam. Testantur id eorum volumina: vapulantque apud castiores Iuris sacerdotes Bartolus, Baldus, Iason cum reliqua ignobili turba: estque exploratum, cacatis in eorum chartis nil sani hac parte inueniri, nihilque solidi offendi. Vnde multo minus veritati consonat, verum vsum differentiæ illarum actionum eo tempore, cum innotesceret ius exoticum, ab hisce Doctoribus idiotis in Teutoniæ fines esse profectum. Itaque pleno ore dicam, fecisse potius ineptias Aduocatorum nouaturientium & Romanis plumis sese ridicule conuestientium, vt Imperator cum imperii Senatu de usuris ob moram in mutuo exsoluendis speciatim ediceret. Nequaquam enim improbabile habendum, fuisse quosdam, qui de mutuo tanquam stricti iuris contractu garrire atque usurpas pe-
ten-



tentibus negarent in stipulationem non deductas.
Sed qui vero fuerunt illi quidam? Rabulæ haud dubie
impudentes, Iura ciuilia & canonica agglomerantes,
quibus propterea obuiam itum, sive res est deducta
ad pristinum morem, æquitasque probata. Æquum
enim in dubia hac questione a Cæsare & ordinibus es-
se prælatum Romanis tricis, verba Recessus Spi-
rensis a. 1600. §. 139. diserte indicant: So viel
nun diesemnach, den zum Eingang iezigen Ab-
schieds angeregten Puncten mutui anlangen thut,
haben sich der Churfürsten, deputirten Fürsten und
Stände anwesende Räthe und Gesandte erinnert,
was derentwegen bei gehaltenen Deputations-Tag zu
Worms im Jahr achzig sechs der wenigern Zahl für-
gangen, unsre damahls anwesende Commissarien
auch sich mit ihnen verglichen, daß nehmlich in dem
vorfallenden Streit, ob nicht in Contractibus mutui, da-
mit die Partheyen in punto liquidationis an unsrem
Kaiserlichen Cammer-Gericht des langweiligen Pro-
cess enthaben seyn möchten, auch ietztgemeldtes Cam-
mer-Gericht damit nicht überladen, ein gewisses loco
interesse a tempore moræ zu statuiren und zu setzen
für BIELEJG geachtet worden, wann der Schuld-
ner in mora restituendi pecuniam mutuam ist, das
Er seinem Glaubiger von derselben Zeithero (der
Vermuthung halben daß der Creditor sein Geld von
solcher Zeit an, anlegen, und zu gelassener Weise
zum wenigsten vom hundert fünff wol haben möge:) das
Interesse zu entrichten und gut zu machen schul-
dig seye, welches wir uns auch gnädigst also gefallen
laß



leßen: So ordnen und wollen wir nechmahl's, daß solch Interesse a tempore moræ erstattet, und berent-wegen den Creditorn fünff Gulden von hundert bezahlet werden. Idque declaratur quadantenus in Re-cessu Imperii a. 1654. §. 174. Quidquid igitur alias pro stricto iure defendendo in medium afferri solebat, nau-ci est factum, nec vultures togati Romana & canonica iura pipantes sunt audit: antiqua fide præualente, ne exularet e foro, simulatque æquitate vincente, quam bonæ fidei adfigere contractibus satagebant ir sulti ac madidi de recenti schola magistri.

§. XVI.

Quamobrem caue axiomatibus ludas, & exceptio-nem probare regulam somnies. Negamus namque regulam de bonæ fidei ac strictis iudiciis inualuisse in-ter Germanos vnquam: vtut nemo forte inficias ibit, incessisse cupiditatem, nescio, quos, qui tam bellas fabu-las docere & auctoritate sua stabilire contenderent, præsertim cum dedicerent paullatim patria instituta, & plaustris testimoniorum certarent, fuosque tractatus auctoritatibus Doctorum ornarent, aut potius onera-rent. Quo circa magnam verborum iacturam faciunt, qui regulam singunt omni æuo in vsu versantem: re-ctius facturi, si aliquot lustris, aut quinquaginta forsi-tan æstatibus contentionem inter patrii iuris defenso-res ceterosque exoticarum rerum proxenetas durasse adfirmassent, donec Imperatorio iussu ac statuum im-perii concentu in viam reducerentur prurientes Con-sulti.

§ XVII.



§. XVII.

Ergo nihil noui parturiuit Germania, sed vetus
retinuit; quod precariis ratiunculis subruere sunt co-
nati patriæ iurisprudentiæ euersores. Vnde non nisi
caliginem obducunt, sumumque excitant, qui latiori
interpretationi obsistunt, & singularia neutiquam pos-
se protendi cum grauitate cantant. Vix enim exten-
dit legem, qui morem ante pedes contrarium inuenit.
Si qui in constitutionibus imperii abrogatam differen-
tiam toties nominatam tueantur, suo id faciant peri-
culo. Nos aliud iter elegimus, idque tutius, adseue-
rando: incognitum illud discrimin Allemannis fuisse,
enatum vt pote e distincto Prætoris ac Iudicis officio ac
disputatione fori & motibus populi nunc ad iustitiam &
^{τὸ πντὸν} atque nunc iterum ad æquitatem, lenitatem ac
prolixam bonamque fidem inclinantis. Quæ omnia
dilucide demonstrant, eos potius singularia ciuitatis
Romanæ decreta, scita iuraque illepede pro vniuersali-
bus venditare, inque mores nostros inferre, quasi sci-
licet Romanæ vrbis pomœria vltra Alpes sint proferen-
da; Quiritiumque instituta peculiaria vel ipsa ratio fo-
rent, vel bona fidei ac stricti iuris negotia diuina essent
lege distincta.

§. XVIII.

At bona fide totum illud discrimin ignorant Gal-
li. Id *Imbertus*, *Marcilius*, *Vinnius* obseruant; nec Bel-
gæ istud attendunt, quod *Gudelinus*, *Grænevvegen* aliquique
commemorant: populi multo acutiores nostris ac Ro-
manis olim permixti; eoque facilius fidem inuenturi
essent, si qui Gallicanis tales contractuum atque actio-

K

num



num formas diuersas tribuere auderent , quam Germanis , quorum mores simpliciores visi sunt semper . Sed salua res est ! Fecit enim Francorum præclara fides , ac viætrix virtus itemqæ Caroli M. decantata æquitas , ne tam subtilis disputatio Francicarum & Germanicarum gentium tribunalia , atque MALLA circumstreateret : vnde nec vllæ leges municipales , nec ius Francorum , Saxonum , Allemannorumque , generalius eius rei mentionem faciunt , sed tanquam ignotum & extra verum vsum positum innoxio silentio transmittunt : commendantes contra in omnibus æquitatem præcipienteſque , ne peregrini in iudiciis federent , sed legem a sapientibus populi refectione diligenter disserent , eamque in consuetudine haberent , vti loquitur magnus Carolus cap. LXII. lib. I. Ab hoc more nunquam in iudiciis ac fori tritura est deficuum : quod tot decisiones in imperii conuentibus probant , ac leges breues & paucissimæ cum libera Magistratum potestate in iudicando peruincent.

§. XIX.

Quibus nihil obducitur , quam iura Romana legitimo ad nos tramite peruenisse : quo obscuro loquendi modo significare volunt , ita ius Romanum publica lege esse stabilitum , hoc vt considerandum nunc sit tanquam vniuersale ; ac cetera vero tanquam statuta singularia , aut consuetudines speciales . Qua in re obstinationes redditii sunt , quum intelligerent , nostras leges consuetudinum nomen ferre ; & has vero esse facti , eoque probandas.

§. XX.

Sed definerent isti forte despere , si bona fide perpen-



penderent, ius Romanum prorsus non esse receptum, nec recipi absolute potuisse. Quomodo enim receptum dici potest, quod ultimo demum loco admittitur, quando iura patria deficiunt? Itaque consistunt Germanicæ leges, iisque utimur, nec ad Quiritium decreta respicere quidem dignamur, sicuti lux affulget e nostris moribus ac statutis. Ex quo confit, id censendum primarium, quod respicitur primum, estque respiciendum omnino. Alterum vero secundarium videri penitus, quod sèpissime negligitur impune; ac tum demum aliquo loco habetur, quando neque *κατὰ τὸ πητὸν*, neque *κατὰ τὴν διάβολον* in nostri iuris latifundiis præsidium inuenitur. Vnde erroris conuincileui opera possunt, qui ius Romanum pro vniuersaliori venditant, proque domina habent, quod sane est ancilla. Istud enim ancillari nobis merito dicitur, cuius operatum demum utimur, quando equi quadrigæque nostræ non videntur sufficere, ac volupe magistratibus est, decurrere ad corpus iuris vastum & formidabile sua mole. Isti vero admodum ad vulgi fabulas recipiendas proni sunt, qui, quod ciuile ius Romanum vocantur *commune*, ei aliquid prærogatiæ, nominis decepti sono, tribuunt. Antequam enim Germani de Quiritium fabulis ac legibus inaudiuere quidquam, huiusmodi nomen ac titulus in Italia iuri ciuili adhæsit: quod Pancirollus *de claris legum interpretibus* docere imperitos potuisset. Quare si hæc appellatio aliquid roboris contineret, omnium Europæarum gentium, quæ iura Romana didicere, intuitu hæc certe pro vniuersalibus habenda essent; quod interea *ἄποπον*.

K 2

Quan-



Quando autem statuta & iura Teutonum atque Francorum consuetudines vocantur, caue sis, eo id fieri sensu putes, quo alias Iurisconsulti consuetudinis nomen accipiunt. Iam dudum enim Innocentius Cironius (*) monuit, factum hoc esse ratione corporis iuris, quod Justinianus orbi Romano obtulit, immenso legum numero plenum; cum vicissim reliquæ gentes, quibus Romani non imperabant, paucioribus legibus regerentur, quarum vim & efficaciam addiscebant e consuetudine, & diligentri rerum vsu; vtut ipsæ illæ leges erant scriptæ.

§. XXI.

Quod cum exploratum sit, liquido demum intellegitur, quam sint inepti homunculi, qui, quod de consuetudine, tanquam iure non scripto, memoriae impreseverunt, sine iudicio ad Germanorum ius scriptum, quod alia plane significatione consuetudinis nomen tulit, applicant, atque in nos probationis onus deuoluere gestiunt; ac si videlicet facti probandi foret, quod est notissimo more introductum, atque e contrario iuris, quod in corpore iuris scriptum. Et hi Idiotæ interea elato supercilio, caperata fronte, in censoriam gravitatem compositi leges imponere ceteris satagunt, eosque nouatores nominant, qui tam illepidam commenta leuiter duntaxat perstringunt. Tu maiori iure id genus ICTos veteratores dixeris, qui tam stolida persuadere adolescentibus eosque abducere a patriis laribus conantur, non habentes, quod suo obtendant incondito ser-

(*) In Observat. Iuris Canon. L. V. c. 7.



sermoni, quam leges Romanas sapientissimas esse; easque vniuersim in Germania receptas, nisi consuetudo specialis, vel generalis in contrarium demonstretur. Ita eadem semper lyra oberrant, & mentiuntur, ius germanorum scriptum, quod ex accidenti consuetudo appellatur, esse extinctum protinus; in quo iis publicæ imperii leges perspicue aduersantur, patria instituta omnino iubentes seruari; proindeque per αὐτοὺς Φον maiori veritatis specie adfueratur, eum videri ad probandum obstrictum, qui Teutonicas leges hac illaue parte iactitat correctas. Ius enim commune eo sensu, quo barbati Doctores volunt, non est commune, sed ancillans, non vniuersale, sed speciale, quia in plurimis tantum subsidiarium est. Quod autem subsidiarium, nemo nisi qui cerebrum gerat in calcaneo, generale appellabit: cum sane adhibetur rarius. Et rara vero ac specialia non presumuntur, sed sensu tabellaque, ut Tullius loquitur, probantur.

§. XXII.

Ehodus igitur viri boni, crassoque sub aere nati! accedite ad hunc ignem proprius, ut paullulum incalescatis, ac melioribus argumentis confirmetis, quod frigidis quibusdam rationibus tueri hactenus laborastis. An igitur hodie permitit natura mutui, ut adiificantur varia pacta, unde nascatur actio? Et putem. Vos vero necessario id negabitis, quia ius Romanum tam diu stare presumitur, donec contrarium doceatur. In stricti iuris contractum nullum intrare pactum potest; quia suis cancellis est finitus. Dicetis: Hodie id esse mutatum. Ego vero nihil, inquam, mutatum, nihil abrogatum scio:

K 3

cum



cum Germani non sint Romani, nobisque cum illis numquam fuerit æqua factio, ac mores vicissim commerciumque linguæ & omnia diuersa. Si vero nihil abrogatum, vnde igitur strictæ formæ hodierno vsu complectuntur pacta?

§. XXIII.

Faciatis porro: PRIMVM a SECUND O accepisse CCC. aureos Philippeos mutuo; atque eos interea aliqua parte fuisse Pseudo-Philippeos, ac fallacissime adulteratos. Adiiciatis, agere SECUNDVM & repetere numeratam summam. De dolo nihil est dictum. In executionis finibus dum res versatur, opponit demum PRIMVS exceptionem doli, & probat. Admittetis ne hanc exceptionem? Si respondeatis: admittimus, quero, an Romanæ iuris prudentiæ sitis periti? Sin hoc, cur in contractu stricti iuris omni tempore atque paullo ante executionem iudicati illam defensionem recipitis, quæ erat opponenda in iure, atque apud nos minimum in primo termino? Ergo eam non audietis: vtut constitutio imperii aliquid circa mutuum nouavit. Id enim vestri coryphæ sine dubio approbabunt, quippe qui strictissime illam interpretandam iudicant; nec mutuum penitus bonæ fidei effectum multis verbis contendunt. Sed sunt tantum verba, quæ nobis nihil incommodi afferunt. Nam Iurisconsulti germana & antiqua fide ex alio capite & principiis solidioribus illam exceptionem non solum non negligent, sed ex parte PRIMVM absoluunt, nec, quanti ipsius interfuerit, Pseudo-Philippeos non accepisse, sine cura transmittent. Vti enim in bonæ fidei contractibus iudices Romani omni tempore



pore ante iudicati executionem ad exceptiones dolii, metus, pacti, animum aduertebant, ita in contractibus *omnibus*, nullo excepto, apud nos merito audiuntur cum defensionibus suis excipientes rei, temporis ratione habita nequicquam. Et is vero risum excitatus esset certo, qui exceptionem respuendo ad actionem de dolo alegaret reum. Quae omnia iudicio sunt, Romanas halce tricas nostris non conuenire rebus. Quod sibi dictum putent contra eentes, simulatque bene perpendant: admodum inficitam illam videri methodum, ac male coharentem, dum quædam pro arbitrio ex iure Romano recipiuntur, quædam iterum expelluntur; & dum rogantur id genus doctores, quare id faciant, vel obmutescunt illi, vel istud stultum A B R O G A T U M E S T superbe ingeminant, quemadmodum e contrario istud πολυθεόλητον C V R S T A R E P R O H I B E A T U R? prolubidine repetunt.

§. XXIV.

Euge vero nouam aperiamus scenam. Quæstio est, an in stricti iuris iudiciis iuretur in litem? Carpzonius adfirmat, Stryckius consentit, Lauterbachius vix dissentit, ut ceteros omittam. Quid ad hæc dissentientes? Remanendum putant in via regia. Quod debetur ex stipulatu, ad id consequendum ius nascitur creditor, sed sine affectu. Similiter rationes in donatione subducunt. Cumque reponitur, promissorem, vel donatorem interea rem conuentam, aut donatam non præstítisse, qui dolus mereretur utique, ut si quidem res rara sit, præsentis affectionis habeatur ratio; tum parumper quidem subsistunt, præsertim,

cum



cum tot celebrium doctorum nomina vident, qui de pragmatico vsu adtestentur; sententiam tamen semel arreptam non mutant. Illico enim subiecta leguntur axiomata: *Dottori de praxi adtestanti non credi*, item, *consuetudinem ad summum videri specialem*, non autem vniuersalem; *pro iure Romano praesumi*, non autem pro consuetudine: alios doctores longe diuersa ratione pronunciasse, quam Carpzouium, Berlichium, Stryckium: quibus perlectis difficile est, Satyram non scribere.

§. XXV.

Itaque efferte huc scopas simulque arundinem, vt operam omnem aranearum perdamus, & texturam improbam, ceu Plautus loquitur in *Sticho*. Ipsimet enim Doctores sunt, & interea testimonium perhibent de vniuersali vsu iuris Romani. Igitur nihil istis credamus; praesertim cum id, quod affertur, non tam testimonium sit, quam fremitus & motus temerarius inconditæ & exoletæ factionis. Cuius asserta si valerent quidquam, ad summum probarent, esse quosdam magistros, qui tam ineptam adoptarunt opinionem, patrias decetero leges iurisque Romani artem ignorantes; aut qui saltem historiam Friderici III. & Maximiliani I. leuiter & per transennam inspexerunt: digni, qui a magistratus munere excludantur vniuersi, atque in album pedaneorum iudicum relati nunquam arbitri fiant, nec proprio quidquam ingenio expendant, sed formularum laqueis constricti, ceu mediaстini, seruant. Vix enim demirari satis possumus, homines in cathedra sedentes nescire,



re, nostrorum iudicium officium non esse seruum , sed nobile; eorumque præsidium implorari, ac propriam prospicientiam, cum iudices Romani actionibus seruiuerint; nec auditum est vnquam , tum demum nobile officium appellari, quando actio est bonæ fidei. Potest id semper fieri , ac sit quoque, multisque in locis hæc clausula salutaris censetur adiecta , et si in libello omissa. Vnde etiam perspicue falsum, in strictis iudiciis nostros Magistratus tantum libellum contueri , nec ingenio suo æquitati innixio indulgere quidquam. Id enim faciunt, qui oculos in dorso gestant, aut etiam in soecis. Quin immo nouo nunc experimento intelligitur, illam iuris peritorum, quos confutamus, concionem, disciplinam de bonæ fidei strictisque iudiciis infelicissime didicisse; quandoquidem vane sibi persuadent, fuisse aliquid differentiae istis in iudiciis ratione libelli expendendi, aut interpretandi. Iudicis enim facultas in bonæ fidei actionibus non pertinet ad interpretationem libelli ; sed ad ea, quæ alterum alteri præstare oportet ex natura conuentionis. In strictis libellus non minus expenditur, quam in alteris: sed erat iudex alligatus ad verba *contrahentium* ; non, vti vulgus rem effert, *libellantium* : cum, si bonæ fidei iudicio agebatur, ex æquo & bono æstimatio fieret, isque ingenio indulgens suppleret ius omissum demptis superfluis & iniquis ex officio. Ac caue sis diccas libellum confici ex actionum natura, hinc iudicem in illum oculos sollicite coniicere. Nemo enim postrem negat, sed in hoc non versatur actionum , de quibus loquimur, discriminem. Vtrinque is simili dili-

L

gen-



gentia incedit. Quæstio est, vnde intelligat, quid contrahentes inuicem debeat sibi præstare? an plus, quam nominatim petitum? an iudex in usuras, fructus impensas, idque, quod interest, considerationem suam intendat? Id enim apud Romanos in strictis negotiis, solius muneris ratione, non poterat. Ideoque indaganter examinatur, an in nostris foris promiscue id liceat iudicantibus? an ius iurandum in litem vtraque in actionum specie locum habeat? an fructus ex stipulatu sint adiudicandi creditori? an usuræ ex mora? Et hic enim crassa & inæquabili voce nobis oggannunt dissentientes contradicuntque in os: quamlibet patria iura nihil unquam in contrarium præcipiant, nec Doctores ius iurandum in litem in strictis iudiciis respuant, Stryckius (*) speciem claram ante oculos constituat, & æquitas fauet, & integra consultorum collegia concinant. Ecur vero isti tam sunt feroce? Quia Gossvino ab Esbach (**) in mentem venit, non constare hinc tamen de integro totius Germaniae consensu: et si Berlichius, Carpzouius, ac plures alii conspirent. Quasi vero ita in concordiam redigi iurium periti possint, nemo ut dissentiat. Nisi certo scirem, Gossvinum fuisse Westphalum, crederem Polonum: adeo ille vñanimia suffragia desiderat, atque faciunt Poloni, quorum conuentus regni vnius nobilis obstinatus ac pugnax animus vanaque contradictione sufflaminat. Ab eo alii videntur didicisse, Berlichii opinionem & Carpzouii niti consuetudine spe-

(*) In tit. ff. do iure iurando in litem §. 6.

(**) In notis & obseruat. ad Carpzouii definitiones fo-
renses part. I. const. XXIII. def. 19.



speciali: prorsus ac si mos vñquam fuisset vniuersalis in contrarium, aut lex scripta in Teutonicarum ciuitatum tabulis, aut ius Romanum omnes Germaniae angulos occupasset, eiusa veteri simplicitate. Tantam hi homines in ventre habent confidentiam; sed atram simul in venis arteriisque bilem, vt nobile officium nostrorum Magistratum nihili faciant; sed eos pro meritis lictis habeant, quos Praetor circumscribat, aut quod multo est insulsius, libellus, aut actionum Romanarum, vt aiunt, medulla vel seueriores efficiat, vel liberaliores uno momento reddat.

§. XXVI.

Itaque ad imperiosa decreta sua prouocant, atque pro editionibus venditant, aliter sese pronuntiasse obtendentes: perinde, ac si eorum sententiæ ius stabilirent Quiritium, ac Diis hominibusque inuitis immutare patriæ iuris prudentiæ faciem aptæ forent; quam olim diuersam penitus fuisse cognoscunt; vel, si nesciant, Melibœo sane hac parte conueniunt, qui Romanam sibi semper similem existimauerat, aut etiam stolidiores eo sunt, dum Romanorum orbem cum Germanico confundunt, &, quod illis in oris familiare ac notum fuit, nostris quoque in locis ac versus septentriones in usu rerum obtainere absurdissime contendunt. Certe, si ea methodus comprobaretur, nullo negotio defenderem, pactis nudis apud nostrates nullam vim obligandi inesse. Sunt enim iuris Magistri, quia tam illepede cogitant, &, quod antepedes est, non vident; nisi monumentis bubulis, vt Plauti verbis vtar, durum eorum ingenium commonefiat. Alibi,

L 2

di-



dicerem, alia ratione pronunciant : mores, de quibus præcipiunt quidam, specialiter recepti sunt: vius vniuersalis tantum abest, vt sit probatus, vt variis Doctores in transuersum secedant. Ius Romanum est introductum in fora, curias, academias : *cur prohibeturflare?* Nec deessent forte, quibus insigniter probarem, quam vtile hoc fuerit inuentu, quam laudabile, ac toti orbi necessarium. Iure Quiritium sapientius esse nihil: esse illud ipsam rationem.

§. XXVII.

Et commodum ad aures meas accedit vox extrema, quam apud alios quoque me legisse memini ac, nifallar, Vincentium Grauinam, qui magno Russorum Imperatori leges Romanas magnificis propterea verbis ac singulari oratione commendauit, quod essent illæ ipsa recta ratio. Tales loquendi modos repetunt aduersarii hac in caussa: non habentes pensi, nullum ius arbitrarium rationibus atque argumentis suis destitui, quam incultus etiam ac barbarus videatur populus. Nec ambigo, quin ipsum ius Moscouiticum certo sensu appellari ipsa ratio queat, ac multo sapientius sit, si contueamur Russos eorumque ingenium & mores comparemus, quam illud Romanum, quod Russis interea exquisitissimis verbis suasit recipiendum Romanæ Academæ Professor. Lubenter ita rem effero, cum IOSTAM SIMLERVM de Republica Heluetiorum paribus usum rationibus deprehendam, quando de Heluetiis suis differens caussam indicat, quare illi Quiritium iura non sint amplexi. Putat quippe, ius istud peregrinum nimis videri acutum, adeoque Heluetiis minus ac-

com-



commodum, ut qui essent homines ingenii simplicioris, ac candidis moribus prædicti: vnde etiam ipsis placuisse ius suum simplex antiqua fide munitum. Nec abludam a scopo, si idem de Germanis nostris prædicem, quibus ideo magis fuisset consultum, retinuisse patria instituta integre, quam transiisse in Romanorum fundum, vbi quidem sollertia regnat, sed varia quoque subtilia inuenta intercurrunt, quibus spes bona fide agentium sæpiissime eluditur: quod Chindasvindus in Visigothorum legibus hoc modo enuntiat (*): *Prohibemus ad negotiorum discussionem usum legum Romanarum; quæ quamvis eloquii polleant, tamen difficultatibus hærent.*

§. XXVIII.

Et tamen multi ex doctoribus nostris sunt, qui hasce Romanas telas omnes inferre in domos satagunt, atque inuita sæpe Minerua rebus nostris applicant: impense gratulati libi, si tale commentum venati in suas id infarcire sententias potuere, praxin iactitantes post hac, inque propria caussa testificantes, in fori tritura a liud ius non obtinere.

§. XXIX.

Sic non ita pridem obseruavi, magnopere lata-
tum esse Ictum veteranum, se in condicione indebiti
vsuras ob moram etiam post litem contestatam petitas
tribus verendis decretis negasse, quod non existimasset,

L 3

libe-

(*) Paullo aliter leguntur hæc verba in Capitularibus p.
981. ed. Baluz, c. 348. abbreviataque sunt ex libro legis
Gothicæ.



liberalitatem constitutionum imperii latius esse porrigendam, quam ad verum mutuum, ad reddere detinet debitor tergiuersator; in ceteris stricti iuris contractibus & actionibus regulam antiquam rectius seruari. At vellem, ne ita definitiones adornasset suas, sed rem maiori cura perpendens æquitatem in *Recessu Deputationis* consideratam simili ratione ante oculos sibi statuisset. Quid enim est conditio indebiti, quam repetitio promutui? Qui ignorans soluit, ac sine causa, nihil sane donat, eoque indebite accipiens nullum habet ius retinendi, quod nec accepit ex liberalitate dantis nec ex alio capite potuit exigere. Quin ponitur, indebita ratione accipientem tardasse, ac omnes moras interposuisse, ne solueret, ac, quod nullo iure acquirere potis erat, redderet. Et tamen iste Doctor animum induxit, cunctantem, et si diu res esset per altercationem ducta, in usurpas condemnandum non videri. Non eum commouebat desidia, non etiam malitia morosissimi debitoris, non æquitas in imperii decreto circumspecta, non denique illa rationi congruens promutui idea; sed Stoico more, veluti immobilis ilex, in opinione sua persistens cunctatori potius, quam damnum facienti fauit, absoluendo illum ab usurpis præstandis, quia de conditione indebiti in dicta imperii sanctione nihil extaret diserte, eaque de cetero actio stricti iuris sit, in qua exigue & exiliter ad calculos vocanda forent omnia, atque illiberale potius facinus committendum, quam rigor deferendus Romanus, pertinacissime vndique seruandus. Sed ego vero iure, credo, consurrecturos in imperii conuentu Senato-



tores sapientes omnes, si tales decisiones librarent cum cura, diuturosque tandem: non tam Stoicas videri, quam Cynicas id genus definitiones: Professores in academiis nimis interdum indulgere ingenio melancholico: hinc tetricos esse haud raro, & ad seueras sententias ferendas admodum propensos. Absolum videri, eos tardare adhuc, & scrupulos iniicere, an æquitas a mutuo ad promutuum sit propaganda? an actiones stricti iuris ferant liberalius decretum? dum viui, viventes, scientes intelligunt, in Teutonia ea de re nunquam fuisse ab ingeniosioribus dubitatum, sed rabularum murmura in contrarium excitata flocci habita, & æquitatem, æquitatem durioribus Quiritium principiis antelatam. Sed ita superstitione peregrini iuris obseruantia in transuersum eos abripit, conscientiae ut rationem habeant nullam, sed secum soli putent, contenti, si e sua familia inueniant adsentatorem, & compilationes, quas conscribillant, barbaris nominibus refertæ, inter sexcenties repetita contra nouatores suspiria, de re futili excrescant.

§. XXX.

Et æquiori autem animo tam angusta in donati-
nibus ac proxeneticis emissâ ac belle commendata de-
creta ferenda crederem, quam in caussa conditionis
indebiti, vbi de damno vitando certauit primum cre-
ditor, cuius reparationem etsi tandem post longam
intercapidinem est indeptus, carere tamen interea re-
vel pecunia sua debuit, qua summa cum iniuria medio
vhus est tempore eiusdem aduersarius minime probus.
Verum tamen vix probo, in usuras nec donatores, nec
pro-



promissores proxenetici esse condemnatos. Pro explorato enim accipio, eum, qui liberalis extitit, non dolo, non metu, non errore esse inductum, ut promitteret, sed proprio motu ac sponte sua certæ rationis munus destinasse clienti, vel amico suo; quo ex promisso ius hic acquisuit certum, ac petendi causam iustum. Nec ambigitur, sed ponitur, nihil interuenisse argumenti, ex quo recedere a proposito & promissione perfecta potuisse debitor. Et is interea nec sit moras; nec vlla interpellatione mouetur, nec, dum pulsatur actione, ad mentem saniorem reddit, sed obstinate detrectat implere, quod modo validissimo est pollicitus. Quæ igitur, quæso, ratio sapientem impellat iudicem, vt parcat homini contumaci & perfidiae pleno, eumque absoluat ab usuris? Si seiuasset fidem datam, & benigne promissa exsoluisset, dubium nullum est, quin vti frui illa pecunia licuisset creditori: cuius usura cum sit intercepta, atque donator retinuerit, cuius retinendi facultatem sibi nesciit ipse ademit, perspicue consequitur, haud inique facturum iudicem, qui donatorem & promissorem cogat non solum, ut præstet reapse, ad quod se obstrinxit; verum etiam lucrum ei excutiat, aut saltem ob moras iniquas illum condemnet ad fructus ciuiles pendendos, seu interrusurum repræsentandum. Quidquid contra assertur, eo reddit: donationem esse stricti juris negotium, ac proxenetam vero ex contraetu egisse innominato facio ut des: nullas igitur adiudicandas usuras videri. In quo quam misere cæcutiant cumque grauitate errent, leui opera ostenditur. Hæc enim negotia hodie sine dubio in pacti causam inci-



cidunt. Pācta vero sine mora sunt effectui danda : hæcque obligatio, cum nostris moribus pro firmissima habeatur, credo, eos risu excipi non immerito, qui e Teutono foro ad Romanorum forum boarium saltant, a rectius sentientibus insultant. Noli reponas, contractus innominatos a pāctis discriminari. Conceditur enim hoc tibi secundum Romani iuris elemen-ta. At Germani contractus innominatos ignorant, pācta que cognoscunt. Est ne vero probabile, pistores, mercatores, opifices, aliosque, qui Romanas tricas bona fide nesciunt, voluisse contrahere more, aut methodo Quiritium sibi ignota? Vereor, ne, qui sic arguunt, inargutissimi fiant & Germanos omnes audiuisse & didicisse doctrinam de contractibus innominatis somnient; de quorum maxima parte ex animi sententia iurarem, incompertum iis esse & fuisse, ater ne sit huiusmodi contractus, an albus? Magis verisimile est, Stichum tuum dicturum, sibi esse pacto promissum: neque nunc opus est, vt inter pācta legitima, & nuda inficete distinguas aut condictionem ex moribus & lege. Res eodem in terris nostris recidit. Quis aus tem legit vñquam, Germanos pācta sua vel stricti iuris, vel bonæ fidei existimasse? Et hi tamen vetustarum fabularum præcones recentiores lCtos reprehendunt, atque innominatos contractus & pācta legitima media in simplicitate Teutonum mente depingunt, Catonem imitati censorem, qui sicuti omnes alii de emissos odore Romæ, ita eosdem illi in Alemannia se sentire vanissime credunt.

M

§. XXXI.



§. XXXI.

Enimuero multis semper experimentis deprehendi, eos, qui maxime iura Romana in praxi laudant, illa tenuiter intelligere, ac pleraque peruerse capere: hinc tot solœcismos in Iurisprudentia committunt, atque peregrinas leges stolidissime applicant: sicuti in transcurso deprehendi, ICtum, quem confutamus, ignorantiæ nouum specimen edidisse, quando in bonæ fidei contractibus actionem quod metus caussa necessariam existimat fuisse, eaque adhuc nos indigere in foro audacter statuit. Quod indicio est, eum prorsus præterire, quid sit, exceptiones in bonæ fidei actionibus inesse? Id enim si cognouisset, nec oculi eius auresque peregrinarentur, nunquam scio, tam mirifica ratione iniisset rationem. Habuere namque in hisce metu coacti ex iure ciuili remedium sat validum, quo consulere partim excipiendo, partim agendo sibi potuere. Tota enim actio quod metus caussa ob angusti iuris formulas videtur inuenta; cum in bonæ fidei iudiciis ipso iure esset armatus iudex, vt nihil faceret huiusmodi promissiones, quibus aut metus caussam dedit, aut in illa negotia incidit. Diserte Vlpianus l. 116. ff. de R. I. quæ est ex eius lib. XII. ad edictum quod metus caussa. NIHIL consensu tam contrarium est, qui ac bonæ fidei iudicia sustinet, quam vis atque metus, quem comprobare CONTRA BONOS mores est: cui Imperator Alexander l. 1. Cod. derecindenda Venditione concinit. Quæ vero vis bonis moribus repugnat, ea vt comprobetur, a nemine sanæ mentis petitur, nec peti potest. Et iudex vero, qui ex æquo & bono pronuntiat, sui obli-



obliuiscatur muneris & metu pressum & ad vendendum e. g. adactum condemnet? contra bonos mores? cum habeat facultatem circumspiciendi totum negotium? nec circulo sit inclusus a Prætore? & partes contraxerint ceu boni viri mutuae fidei benevolentiae que innixi? Et ita tamen patronus malae huius caussæ animum inducit ac iuris Romani peritiam insignem iactat. Id patior, valuisse summo iure stipulationem, acceptilationem, cetera, coactisque vix aliter, obfori corruptionem, succurri potuisse largior, quam Prætoris tremenda rescissione, ac restitutionis in integrum notissimo præsidio, aut etiam exceptione nominatim auctori obuertenda, vt ostendit, l. 9 § 3. ff. *quod metus caufsa.* Iam autem in negotio liberaliori talem consensum iusto metu, id est, non vano, sed qui constantem hominem terrefaciat, elicitum singe; quis eum sustineri credat fide bona? adeoque tota emptio & venditio potius erat nulla; cum illa sine consensu nec sit, nec mente percipiatur. Idque est, quod Vlpianus *non sustineri* vocat, ac iuris naturæ ac gentium peritissimi scriptores noui aliis duntaxat verbis efferunt, quando metum adhibentem non habere ius acceptandi dictirant. Repugnat enim illi lex diuina, vnde mores boni omnis tanquam ex liquidissima luce manant, qui interea neutiquam ferunt, vt quisquam id genus confessionem habeat pro rata. Tantum id discriminis animaduertitur: vt in causis strictis, quæ suam habebant certam in foro Romano formam, tantisper valeret, donec imploraretur prætoris munus, quo rescinderet improbe coalita. Iudex vero, qui iure ipso in bona fidei actionibus suo officio fungeba-



batur, & metum atrocem iniectum obseruabat, non expectato alieno auxilio, propria auctoritate totam confessionem irritam pronuntiabat; quod non est restituere in integrum, nisi quidem insulsissime existimes, iudicem pedaneum restituisse in integrum. Hæc leguleii ex Nodtii ac Schultingii animaduersionibus dudum potuissent discere, quid? quod a Iacobo Gothofredo petere lumen in *collationibus* ad dictam iuris regulam.

§. XXXII.

Sed talium virorum scripta rarissime euoluunt, qui pragmaticæ scientiæ laureolam afferant, volitantes sine theoria, nec nisi graculorum conclamantium strepitum quærentes: vnde suadendum illis, vt, quæ cap. I. §. LV. de eo, quod tollitur ipso iure, & quod per exceptionem infirmatur, scripsimus, curatius meditentur. Forte deprehendent, vel oblitos sese talium in ludo, in quo tam diu fuerunt, vel plane nondum intellexisse, ita vt tota hæc doctrina auribus sit deuoranda noue. In quo sane sapientius versabantur, quam si thema de efficientia metus more suo examinent, ac Romanorum inuentum sapientissimum prædicent, solum vt habeant, quod in Puffendorffio, Thomasio, Titio reprehendant. Non est propositi mei, excutere paralogismos omnes; quia integrum requireretur volumen: solum figmenta adtingam nulla verisimilitudinis speciei sese commendantia.

§. XXXIII.

Quid? Romani, inquiunt, prouidentissime metu initos contractus non illico voluere nullos, ne prædones interficerent, aut peiori modo excruciarent, quos suis copiis & pecunia emungunt per vim metumque; rati-

tan-



tantisper, se tuituros accepta, vel, si nondum secuta traditio, se indepturos promissa. Tam simplices & minimi astutos isti fingunt aggressores hominesque violentos Romanos, ac si nesciissent ius publice dictum in foro, vbi aliquot millia ICtorum iudicunque circumcursitabant. Quo auctore igitur, merito quæres, illa legis Romanæ ratio probabitur? Nullo: nisi fortean prudentibus & rerum suarum peritissimis Romanis commodatur Plauti sententia in Truculento *act. II. Sc. 2.*

VERVM ego illum, quanquam violentus est, spero, mutari potest. At dolendum, ancillam, Astaphium dictam, quæ sic loquitur in scena, iurum fuisse ignarissimam. Ipsi Romani varia negotia, in quibus metus intercurrit, aut caussam iis dedit, ipso iure infirma pronuntiarunt. Quod si est, quemadmodum ipsimet fatentur, qui tam mirificam rationem comminiscuntur, nihil sane erat, quod coercere seruos poterat manumissionem dominis extorquentes, aut etiam ceteros, sponsalia, dotem, matrimonium, & quæ hinc pendent, promissa ingratitiis exprimentes & inuitis. Ac, caue, regeras, factum id ob singularem rei ac personarum fauorem. Illico enim respondeo, precariam hanc videri benevolentiam, ac fauorem minus propitiuma, si in vitæ periculum coniiciantur, aut indignioribus modis trahentur eiusmodi priuilegio donati: quia, secundum aduersariorum mentem perspicue sic aggressores truculenti intelligunt, omnia inaniter peragi, seque hi antes & magnas diuitias anhelantes certissime iri delusum; eoque concludendum, in omne genus crudelitatis eos esse erupturos. Quare apage sis, quæso, in-

M 3

uen-



uentum tuum & sanioribus doctrinis ausulta, ne soccos, tunicam, pallium amittas. ac quasi vestitum, hoc est, nudum te tui conspiciant.

§. XXXIV.

Maioris enim ponderis est, quod viri præclarissimi obseruant. Quirites nondum bene coctos politos que exerto verborum cortici adhæsisse; existimantes, consensisse interea metu ad promittendum compulsos; consentientes autem non videri ab omni obligatione immunes: præsertim cum stipulatio, acceptilatio, litteræ interuenere, variis vinculis munitæ, aut traditio accessit. Crimen vero, quale est impressio tam atrox, in ciuitate, ubi tuta omnia, non, inquietabant, præsumi. Audiendum existimabant igitur; quandoquidem sumum ius agenti ac coniecturæ nonnullæ fauebant. Cumque iudicis officio consulteretur in bonæ fidei iudiciis metum passis; solæ restabant angustæ contraria formæ, in quibus ob fori corruptelas deficiebat iudicis auxilium formulæ addicti. Vnde Prætor sese interponebat demum, qui, quæ extus videbantur firma, rescidit; ac rescindendo in integrum vniuersa restituit; ratum non habens ex post facto, quod pessime & contra bonos mores coaluit. Iudex vero extra formulam constitutus ac sua religioni relictus retro declarabat nullum, quod bona fides sustinuit nunquam: vnde nec restituebat in integrum, nec Prætoris interuentum exspectabat, cum grauatos recreare ipsem et officiique sui partes bona fide & quantum æquius, melius, exsequi quam liberalissime posset.

§. XXXV.



§. XXXV.

Quod propterea adnoto, ut quos torpentes occupat somnus, eum illi depellant ab oculis ac næuum iurisprudentiæ Romanæ agnoscant, quæ longo temporis interculo metu iniusto compressis nullum fere impertire auxilium poterat, ob inolitam in foro differentiam contractuum bonæ fidei ac iuris stricti indeque manantium actionum. Quare in re apertissima cæcutiunt certe, qui in foro nostra labem hanc, næuumque istum cupiunt reduci, iactantes vane, subtilitatem nouatoriæ maiorem videri, quam Romanorum, dum illi naturalem in metu gestis obligationem agnoscent nullam, hi vero aliquam, vtut rescindendam. At bona, quæso, verba! Quid enim simplicius est, obligationem non admittere, quam admissam ex ratione minus sufficienti, rursum expellere? Qui acquirere obligationem & indipisci ius flagitat, caussam adducat oportet. Adducatur ergo, eaque cogens, ac pondere præstans. Consensum est, inquis. Nego. Coacta voluntas est voluntas: accipio: sed hæc voluntas nondum efficit consensionem. Bini requiruntur minimum, de quibus conspiratio in unum placitum prædictetur; ac prædo vero non potest acceptare, quod promittitur, quodue datur: quocirca nulla adest consenso, cum hæc sine acceptione nequeat intelligi. Eamque D E V S impedit, qui legis naturalis est sanctissimus auctor; ita vt nihil obligationis acquirat metum incutiens, nihilque iuris accipiat sine causa legitima. Quod in errorem rapit extra orbitam vagantes, hoc est. Considerant illi vocem *consensus* grammaticæ, & in-



interea sensum iuridicum securi præteruehuntur : rati, velle Caium prædonem stipulantem , ac velle quoque Sempronium ex metu respondentem : itaque amplius nihil requiri ad consensum integrum. Quod quam secundum litteram verum ; tamen falsum id est secundum iuris diuini limpidiorem cognitionem, quod non patitur, vt is aliquid acquirat iuris, qui ius spernit, & pedibus ferociter conculcat, nec caussam habet iustificam vllam , quare vi, metu, malo in eam necessitatem adducat socium, aut saltem sibi æqualem, vt det, promittatue. Quocirca verba sunt ac mera putamina, sub quibus male sane latitant sophismata, ambiguitates & exerrationes. Quid enim hoc est, si non mere nugatorium est ? Lex, inquiunt, caussa *remota est*, contractus caussa *proxima* ; hinc labi omnes, qui leges creari obligationes & contractus ex nihilo credant. Scilicet talium mercium & distinctionum venditores isti sunt, qui varias inter intemperias tam leuia excogitant. Thomasii (*) quem oppugnant, sententia est : etsi datur, in conuentionibus metu extortis inueniri pacta; non hæc tamen per se obligare, sed a lege diuina corum vim primariam venire, vt quæ iuberet pacta seruanda: & hac vero in specie, vbi vis interuenit, ac metus, sine temeritate id adseuerari non posse ; iubere igitur DEVM, vt ne eius generis seruetur pactum , aut delinquens ex illo aliquid commodi ferat. Nemo non intelligit, cauillari Grosippum, dum sic creari contractus infert. Versamur hic in regno rationis , vbi intelle-
ctu

(*) Iurisp, diu, Lib. II. c. 7. §. 3.

Et uero percipiunt omnes, homines affirmare, negare, his illisque consentire; ab alteris dissentire, ac pacisci demum, seu contrahere: sed obseruant simul, ex contra-
etu nullo nasci obligationem solidam, nisi ille legi di-
uinæ congruat; caussam remotam dicas, an alia illam
ratione circumscribas. Ut enim in conscientia ob-
stringamus ad seruanda promissa, Dei iussio efficit,
quamuis verba hominum consensum exprimentia, aut
facta eundem indicantia proxime interueniant, istaque
nemo sapiens excludat. At finge, me nolle promissis
paetisue stare: quo argumento, rogo te, me compel-
les, ne fidem datam infringam. Si pacta statuas fer-
uanda, nego; simulatque probationem adassertionis
tuæ exigo. Iam ergo proba. Et nullum tibi præsi-
dium supererit, nî dicas, Deum id præcipere, inque
eos animaduersurum grauiter, qui perfidia sua homi-
num perturbent societatem atque odiis, iris, aliisque
sceleribus aperiant fenestram. Ac puto, te nunc de-
mum intellectum, pacta obligare homines interue-
niente, vel, vti tu loqui amas, mediante lege; quæ si re-
fragetur, nemo sane mortalium obligabitur; et si gram-
matice partes consenserint centies; neque e contrario
ius obligationemque inde acquiret ullus. Mirum est,
eos, qui alias leiuilegorum sectæ sese addixere, non
agnoscere, totam obligationis vim vanescere, si obsi-
stat lex ciuilis: quanquam perfectus dicitur contra-
etus, quanquam mulier fideiussit, quanquam hæreditati
renunciatum, aut de illa acquirenda solenniter
conuentum. Ac si vero tantæ efficaciæ est lex ciuilis;
legi certe naturali minor adtribui virtus nequit. Ig-
tur

N



tur parum proderit garrulis, si proximam caussam obligationis consensum pacifcentium dicitent, vbi in contrarium præcipit, aut prohibet supremum Numen, ne quis sodalem per vim, turbulente, & per furorem malitiose cogat; immo eo ipso omnis obligationis acquisitio, seu ius acceptandi perimitur. Quæ insperguntur in contrarium, ad scopum non pertinent. Misera quippe argumentatio est: consistere iure ciuili nihilominus quasdam obligationes, et si contra leges coagimentantur; nec matrimonia dissolui, aut nullius firmitatis esse; quamuis liberi sine Parentum consensu nuptias festinent. Multa enim ex aliis caussis ac visionibus tolerant legislatores humani, quæ secundum rigorem sine robore forent. Deum autem in tam atroci scelere connuere & nihilominus latroni ius obligationem acquirendi largiri, quod in statu naturæ stabilitatem vel momento consequeretur, inconcinnum videtur atque omnino absurdum: præsertim, dum metu adactus promissum implere renuit, aut datum repetit. Aliud vero thema est, an ob certas rationes Romani potuerint tantisper sustinere, ac dein demum negotium totum abolere? Tum enim in effectu quidem parum intererit; sed omnes tamen ratione pollentes adfirmabunt indubie, eos longa circumitione præter necessitatem vsos id aboleuisse, aut *rescidisse* perperam, quod non fuit. Quæ veritas Antonio Schultingio I^oto ac rerum Romanarum grauissimo interpreti ingenuam hancce confessionem (*) expressit: *Iure naturali*

ei

(*) Ad ff, quod metus caussa gestum §. V.



ei, qui vim metumque alteri illicite intulit, non videtur verum aliquod ius adquiri, cum hic alius consenserit, non quia voluit, sed quia coactus est & debuit: ac sic vera & libera voluntas defuerit: & a parte eius, qui metum intulit, desit iusta obligationis acquirendæ causa: quæ sententia est etiam Viri præclari, Sam. Puffendorffii de iur. natur. & gent. Lib. III. cap. 6. §. 10. & Lib. IV. cap. 2. §. 8. ad quem videri potest Cl. Barbevrac. Ac etiam longe hoc est simplius, quam si dicarūs, ius inde nasci: verum eum qui metum aut vim intulit, leso teneri ad restitutionem damni iniuria dati; quod putauit Vir summus, H. Grotius de iur. bell. ac pac. Lib. II. cap. 2. §. 7.

§. XXXVI.

Istud vero cantherinum prorsus somnium est: sic omnes actiones futuras dativas, si legi tribuatur prima ria obligationis producendæ vis. Quis enim legi in specie tribuit obligationis procreationem? Pangant homines, consentiant in unum placitum, contrahant: sunt enim συναλλάγματα hominum, non Dei, ciuium, non legislatorum. At contrahant legi conuenienter aliquin non contrahunt, non consentiunt, non acceptant, nihil iuris acquirunt: sicuti latro nihilex furore ac scelerre suo compendii nanciscitur. Is cui vis illata, ne momento quidem fuit obligatus, non, si sacramento sese obstrinxisset, non, si mancipio & nexu res suas omnes tradidisset. Hoc, Grosippe, attento animo debuisses rimari, antequam sophistico ac temerario strepitu Moralistas, ceu tu eos appellas, addorirere, quorum doctrinas non intelligis, sed in glossarum ac definitionum vulgarium



rium syllab s numerandis consenuisti , notum adolescentibus vendens farcimen , concisis adipibus , comminutis pulmonibus , carnibus putrefactis , ac , nescio , quibus aliis rebus nauci , commistum refertumque : quo si vescantur , haud dubie eorum turbabitur venter , quia difficile digestu , nec , nisi longo ieiunio , aut ambulatione per uigilioque vincendum conterendumue . Nos a te doceri non cupimus : res tuas tibi habeto : modo teneas & nostros scire , actiones nasci , nec ex nihilo per legem creari : quamuis prohibente lege nihil nascatur iuris , sed demum illa permittente , aut iubente pro re nata obligationes oriantur & acquirantur , accedente hominum artificio , aut iusto contrahentium consensu .

§. XXXVII.

Quæ donec cum cura animo reuoluas , ceteris quoque in transcurso respondemus , qui in contractibus stricti iuris saltem , quibus dolus caussam dedit , actionem subsidiariam doli adhuc necessariam existimant . Haerent enim & illi eodem in luto , quando in foris nostris differentiam contractuum stricti iuris & bonæ fidei vigere persuasum habent : cum interea ad nauseam usque ostenderimus , bona fide omnia pacta sua contractusque adornare Germanos , nec in futurum emergentia a iudicis rationabili arbitrio excludere . Statue igitur , Curatoreni transegisse cum Pomponio maiori XXV. annis ; totamque actionem administratæ curæ in Aquilianam stipulationem deductam acceptilatione extinxisse ; cui interea dolus curatoris caussam dedit . Quæstio nascitur , qua actione , quod sibi deest consequi queat Pom-



Pomponius, præsertim cum actio curatelæ videretur extincta? Species hæc in l. 4. C. de transactionibus extat, mirumque non est, actionem doli subsidiariam ab Imperatore Alexandro roganti Numidio commendari: at nostris Doctoribus vitio merito vertitur, quod eadem hodienum lyra oberrantes de actione doli subsidiaria in contractibus stricti iuris tam incondita effutunt. Totâ stipulatio aquiliana, & eam consequens acceptilatio ne quidem pili fit: actioque curatelæ nullo modo est exticta. Nihil enim remittit, cui dolus obiecit glaucoma. Romani aliter: sed Teutones illo prætorio non indigent auxilio: totum negotium pro nullo habetur; inque fumum abit transactio, cui innititur dolosus curator. Istud autem valde peruulgatum & nullius eruditioonis videtur, ciues nostros nunc vti iure Romano, & a prima simplicitate rationis descivisse. Quando enim descivere? Quis vtitur apud nos Aquiliana stipulatione? quis acceptilatione, solenni pristinam obligationem extinguit? Idipsimet fatentur, pacto hodie, vt olim stipulatione, omnem obligationem dissolui, verbis, an alio modo fuerit contracta. Et tamen pactum hoc esse stricti iuris illiberaliter decernunt. Quid? quod facias, esse fungos, qui peregrinis Aquilianæ stipulationis instrumentis transmutarent obligationem ex consensu in verbalem, hancque dein acceptilatione delerent; non haberet tamen tota hæc machina plus roboris, quam pactum simplex, quod dolum non patitur, ac strophas, fucosque omnes excludit. Et quis vero contrahentium demum in Germania de Aquiliana sti-



pulatione cogitat, aut sibi persuadet vñquam, stipulationem, vel acceptilationem firmioribus fulcris sustineri, quam pactum? Noli obloquaris, perinde interea videri, nullum dicatur negotium, an actione dolis rescindatur? Qui enim talia deblaterat, in iuris disciplina exiguos fecisse progressus videtur. Doli actio Romana multa habet singularia. Est odiosa, durat biennium, est & exceptio dolis tempestive obicienda. De his nihil resciuere Teutones: durat illa tam diu, quam actiones in personam ceteræ; quamlibet mihi incognitum non sit, quam perperam hac etiam in causa ICti de triuio sudent omni philosophia destituti. Quod si enim ea forent imbuti, totamque doctrinam de dolo malo ad rationis decempedam exegissent diligentius, apprehendissent certe, nihil inficetus posse cogitari, quam eum vlo minimo momento cum firmitudine obstringi, qui fraude ac technis ad paciscendum contrahendum-ue est traductus. Quin nec ipsi Romani tam illepede vñquam rationes subduxissent, nisi verbis inhæsissent tam anxie, vt lubentius aliquid tolerarent malitiae, quam negligenter *το πντον*, ac semel, vtut turbulente, stabilitas sententias: donec demum actionem dolis inueniret Aquilius malitiarum omnium euerriculum. Sed hoc euerriculo nostri profecto non egent; qui hac parte in simplicitate naturali acquieueret, nec conditionem suam deteriorem fecere vñquam. Quocirca in dederius mutant omnia; qui habitum Romanum ciuibus suis circumdant, atque interea magnopere sibi gratulantur, quando inueniunt Doctorem actionem dolis subsidiari-

am



am sua auctoritate stabilientem, decretaque sua cum supercio iactantem. Nos aliter pronuntiamus ; nec dubium, quin, si rationibus certetur, & sapientiores audiantur, tandem aliquando illa futilis Pragmaticorum opinio foro sit cessura.

§. XXXVIII.

Plura non addo, sed ad finem dissertationis pro-
pero ; modo ostenderim prius, nec cambium hodie ad
stricti iuris contractus referendum, nec actiones inde
oriundas : quanquam sunt, qui sic arguant. Primo
enim tanquam certissimum sumo, non esse collybisti-
cum, seu cambiale negotium Romano mori prorsus
conueniens ; deinde si forte *cambium manuale*, seu mi-
nus ad contractum do ut des referri posset, consta-
re puto, permutationem fuisse contractum bonæ fidei,
aut, si cui arrideat idea *mutui* paratissima executione,
aut sicut Paulus ICtus rem exprimit, numero habendi
commodo muniti, iterum patebit, iudices nostros non
sic esse adstrictos, ut, quæ debitor creditori, aut creditor
vicissim debitori ex post facto & alia causa præstare de-
bent, negligere cogantur. Quin si in mora fuerit de-
bitor, in usuras notissimo iure condemnatur : nulla
licet earum mentio in litteris facta. In locali cam-
bio vero, quam laxa sit iudicis potestas, illi vix du-
bitant, qui aberrationes actorum & aduocatorum ce-
leritatem litis impedientes iure eum & ex officio
emendare norunt : ut præteream, nunquam etiam
negligere iudices nostros exceptiones altioris indagi-
nis



nis, dummodo nec retardetur citus litis ordo , atque in reconuentione eadem latius deducantur. Quæ omnia secus erant in strictis Romanorum iudiciis.

§. XXXIX.

Vnde concluditur demum, vanissime iactari usum actionum bonæ fidei & stricti iuris , cumque quidam pragmatici ad præiudicia prouocant , aliud nequicquam probant, quam dari pragmaticos nonnullos patrii ac Romani iuris inscios , quibus cum ægrotare nolunt Hallenses, virique alii celeberrimi, qui iam dum istas Romani fori corruptelas contempserent: probe gnari, non aliter apud Germanos diiudicari contractus, quam pacta, quæ sicuti omnia sunt bonæ fidei; ita actiones inde fluentes alterius commatis esse neutiquam posse. Hæc breuibus: nec enim licuit tam densam exscindere errorem syluam, quæ tot Prætorum occupat volumina. Tu vero qui resipiscis, cedo dextram, ut loci simus & coniunctim adoriamur veterum ineptiarum scrutarios, donec & hi nobiscum in gratiam redeant cumque Plauto exclamemus vniuersi: Babæ, Tatæ, Papæ, Pas!

TANTVM EST.




155053

AB

AB 155053

KL 468 ad





B.I.G.

Black

3/Color

White

Magenta

Red

Yellow

Green

Cyan

Blue

Farbkarte #13



DE
ACTICO
ONVM
E FIDEI
ET
IVRIS
TABIT
S I D E
ONYMO GVND-
O ICT.
NTISSIMO BORVSSIAE
SET ECCLESIASTICIS IV-
ORDINARIO h. t.
ANO
AS CIC 10CC XXIV.
P. C.
HIS DOCTORIS
VENDIS
IEL ANDREAE
NASSOVIVS.
GDEBVRG.
KELM, ACAD. TYPOGR.

5